



**NOGOMETNI/FUDBALSKI SAVEZ
BOSNE I HERCEGOVINE**

**PRAVILNIK
o registraciji, statusu i transferu igrača**

Sarajevo, decembar/prosinac 2017.

SADRŽAJ

DEFINICIJE

I OPŠTE ODREDBE

II REGISTRACIJA KLUBOVA

III REGISTRACIJA IGRAČA

1. Organ za registraciju igrača
2. Registracija
3. Registracijski period (prelazni rokovi)
4. Neregistrovani igrači
5. Registracija maloljetnih igrača koji su članovi nogometne/fudbalske škole ili akademije
6. Registracija igrača koji dolaze iz inostranih klubova
7. Preregistracija
8. Registracija bez ispisnice i brisovnice
9. Certifikat o međunarodnom transferu (ITC)
 - 9.1. Izdavanje ITC-a za igrača profesionalca
 - 9.2. Izdavanje ITC-a za igrača amatera
10. Ustupanje profesionalnog igrača

IV POSEBNE ODREDBE VEZANE ZA DOKUMENTACIJU POTREBNU ZA REGISTRACIJU IGRAČA

1. Predmet registracije
2. Obrasci za registraciju
3. Prijava za registraciju
4. Ispisnica
5. Sportska legitimacija
6. Brisovnica
7. Pasoš igrača

V OBJAVA REGISTRACIJE

VI PRAVO NASTUPA

VII PROMJENA KLUBA

1. Pravo na promjenu kluba
2. Odustajanje od promjene kluba

VIII ZAŠTITA MALOLJETNIH IGRAČA

IX STATUS IGRAČA

1. Status igrača
2. Igrači amateri
3. Profesionalni igrači
4. Zaključivanje ugovora sa profesionalnim igračima
5. Prekid (prestanak) aktivnosti
6. Vraćanje amaterskog statusa

X ODRŽAVANJE UGOVORNE STABILNOSTI IZMEĐU PROFESIONALNIH IGRAČA I KLUBOVA

1. Poštivanje ugovora
2. Zaštićeno razdoblje
3. Sporazumni raskid ugovora
4. Raskid ugovora iz opravdanih razloga
5. Posljedice raskida ugovora bez opravdanog razloga
6. Raskid ugovora iz sportski opravdanih razloga
7. Jednostrani raskid ugovora
8. Posebne odredbe u vezi sa ugovorom između profesionalnog igrača i kluba
9. Dospjele novčane obaveze kluba

XI UTICAJ TREĆE STRANE NA KLUBOVE I VLASNIŠTVO IGRAČEVIH EKONOMSkih PRAVA

XII NAKNADA ZA TRENIRANJE IGRAČA

XIII MEHANIZAM SOLIDARNOSTI

1. Solidarni doprinos

XIV RJEŠAVANJE SPOROVA

1. Sporovi u vezi sa registracijom igrača
2. Sporovi u vezi sa ugovorima
3. Rješavanje sporova po osnovu zahtjeva za treniranje igrača
4. Sporovi igrača i zastupnika igrača

XV ZAHTJEV ZA ZAŠTITU ZAKONITOSTI PRIMJENE PRAVILNIKA

XVI ODREDBE O FUTSALU

XVII ODREDBE O ŽENSKOM NOGOMETU/FUDBALU

XVIII PUŠTANJE IGRAČA ZA REPREZENTATIVNE EKIPE

XIX TAKSE

XX TROŠKOVI POSTUPKA

XXI PRELAZNE I ZAVRŠNE ODREDBE

Dodatak 1 - Procedura koja reguliše zahtjeve za prvu registraciju i međunarodni transfer maloljetnih igrača

Dodatak 2 - Sistem praćenja transfera (TMS)

Dodatak 3 - Mehanizam solidarnosti

DEFINICIJE:

1. **Prethodna asocijacija:** Asocijacija kojoj pripada prethodni klub
2. **Prethodni klub:** Klub koji igrač napušta
3. **Nova asocijacija:** Asocijacija kojoj pripada novi klub
4. **Novi klub:** Klub kojem igrač pristupa
5. **Službene utakmice:** Utakmice koje se igraju u okviru organizovanog nogometa/fudbala, kao što su nacionalna prvenstva, nacionalni kupovi i međunarodna prvenstva za klubove. Pod službenim utakmicama ne podrazumijevaju se prijateljske i probne utakmice
6. **Organizovani nogomet/fudbal:** Nogomet/fudbal organizovan pod okriljem FIFA-e, konfederacija i asocijacija/saveza, ili organizacija koje su ovlaštene od istih
7. **Zaštićeni periodi:** Period od tri potpune sezone ili tri godine, u zavisnosti od toga šta prije nastupa, po stupanju na snagu ugovora, ukoliko je takav ugovor sačinjen prije 28. rođendana profesionalnog igrača, ili period od dvije kompletne sezone ili dvije godine, u zavisnosti od toga šta prije nastupa, po stupanju na snagu ugovora, ukoliko je takav ugovor sačinjen nakon 28. rođendana profesionalnog igrača
8. **Registracijski periodi (prelazni rokovi):** Periodi određeni od relevantne asocijacije u skladu sa članom 14. ovog Pravilnika.
9. **Sezona:** Period koji započinje s prvom službenom utakmicom relevantnog nacionalnog prvenstva, a završava posljednjom službenom utakmicom relevantnog nacionalnog prvenstva
10. **Obeštećenja za treniranje:** Isplate koje se vrše u skladu sa Dodatkom 3 ovog Pravilnika kako bi se finansirao razvoj mladih igrača
11. **Maloljetni igrač:** Igrač koji nije navršio 18 godina
12. **Akademija:** Organizacija ili nezavisni pravni subjekat čiji je primarni dugoročni cilj da igračima obezbijedi dugoročan trening kroz osiguranje neophodnih objekata za treniranje i infrastrukture. To prvenstveno podrazumijeva, ali se ne ograničava na, centre za treniranje nogometa/fudbala, nogometne/fudbalske kampove, nogometne/fudbalske škole itd.
13. **Sistem praćenja transfera (TMS):** Sistem praćenja transfera (TMS) je sistem vođenja podataka preko interneta s primarnim ciljem da se pojednostavi proces međunarodnih transfera igrača, kao i da se unaprijedi transparentnost protoka informacija, a što je regulisano Dodatkom 2 ovog Pravilnika.
14. **Treća strana:** Strana različita od klubova između kojih se vrši transfer igrača, ili bilo kojeg prethodnog kluba za kojeg je igrač bio registrovan.

Na osnovu člana 35. Statuta Nogometnog/Fudbalskog Saveza Bosne i Hercegovine, a u skladu sa FIFA Pravilnikom o statusu i transferu igrača od 01. aprila/travnja 2015. godine, Izvršni odbor Nogometnog/Fudbalskog saveza BiH na sjednici održanoj dana 22.12.2017. godine, d o n o s i:

P R A V I L N I K

o registraciji, statusu i transferu igrača

I OPŠTE ODREDBE

Član 1.

Ovim Pravilnikom uređuju se opšta i obavezujuća pravila koja se tiču pitanja registracije klubova i igrača (nogomet/fudbal, futsal i ženski nogomet/fudbal), postupak promjene kluba, status igrača, uslovi zaključenja ugovora između klubova i igrača, stjecanje prava nastupa, opšti uslovi za naknade za treniranje i razvoj igrača, kao i drugi elementi važni za status igrača i registraciju klubova i igrača.

U smislu ovog Pravilnika, ako nije drugačije određeno, pojmovi igrač ili fudbaler odnose se na osobe oba spola.

Član 2.

Nogometni/Fudbalski Savez Bosne i Hercegovine (u daljem tekstu: NS/FS BiH), u smislu ovog Pravilnika, obuhvata sve saveze i klubove registrovane u BiH.

Član 3.

Odredbe ovog Pravilnika obavezne su za sve saveze, klubove i igrače u Bosni i Hercegovini.

Član 4.

Sastavni dio ovog Pravilnika predstavljaju:

- Dodatak 1 - kojim se propisuje procedura koja detaljno reguliše zahtjeve za prvu registraciju i međunarodni transfer maloljetnih igrača;
- Dodatak 2 – kojim se reguliše sistem praćenja transfera (TMS);
- Dodatak 3 – kojim se reguliše način obračuna solidarnog doprinosa.

II REGISTRACIJA KLUBOVA

Član 5.

Članovi NS/FS BiH donose odluku o nadležnim savezima za registraciju klubova i igrača, a verifikuje ih Izvršni organ NS/FS BiH.

Uslovi koji moraju biti ispunjeni da bi savez mogao imati registracionu nadležnost propisani su Pravilnikom o uslovima koje moraju ispunjavati registracioni savezi za vršenje registracija klubova i igrača na teritoriji NS/FS BiH.

Član 6.

Prijava za registraciju klubova podnosi se savezu nadležnom za registraciju. Registracije se provode po proceduri propisanoj ovim Pravilnikom i to:

- a) nogometnih/fudbalskih klubova;
- b) futsal klubova i
- c) ženskih nogometnih/fudbalskih klubova.

Da bi klub postao član NS/FS BiH, potrebno je da ispunjava slijedeće uslove:

- a) da nadležnom savezu podnese molbu za registraciju i prijem u članstvo, u kojoj se obavezuje da će raditi prema Statutu, pravilnicima i odlukama NS/FS BiH i njegovih organa i organizacija;
- b) da podnese rješenje nadležnog organa da mu je odobren rad i da je registrovan kod nadležnog suda, odnosno nadležnog organa;
- c) da podnese izvode iz zapisnika sa osnivačke skupštine sa spiskom članova uprave;
- d) da priloži prepis statuta i Rješenje nadležnog organa o licu za predstavljanje i zastupanje kluba;
- e) da uplati upisninu i članarinu, čiju visinu određuje nadležni savez za registraciju;
- f) da registruje najmanje 20 (dvadeset) igrača za klub nogometa/fudbala, ili najmanje 10 (deset) igrača za klub futsala, odnosno najmanje 15 (petnaest) igrača za klub ženskog nogometa/fudbala;
- g) da ima sopstveni ili ugovorom obezbijeđen stadion/dvoranu za futsal.

Nadležni organ za registraciju neće registrovati klub ukoliko ne ispunjava uslove iz predhodnog stava, ako statut kluba nije u skladu sa Statutom NS/FS BiH i statutima njegovih članica, kao i ukoliko prijavi ime kluba iz istog mjesta koji je već registrovan pod tim imenom.

Nadležni savez za registraciju, putem organa kojeg ovlasti, odlučuje o predmetu registracije kluba.

Klub može promijeniti ime kluba najkasnije 30 (trideset) dana prije početka takmičenja/prvenstva. Klubovi koji su promijenili naziv kluba, potrebno je da prilože sledeće dokaze:

- 1) Podnijeti zahtjev nadležnom registracionom savezu, sve kao u tački 1. stava 1. ovoga člana;
- 2) Dokaz opisan na način kao u tački 2 stava 1. ovoga člana;
- 3) Dokaz – zapisnik sa Skupštine na kojoj je usvojena promjena imena kluba;
- 4) Dokaz kopija Statuta sa promijenjenim imenom kluba;
- 5) Dokaz o uplatiti upisnine i članarine vezano za promjenu imena kluba.

Odluka o promjeni imena kluba obavezno se objavljuje u Službenom glasniku, u skladu sa važećim propisima.

Klubovi se mogu spajati pod uslovom da su iz istog Područnog/Kantonalnog/Županijskog nogometnog/fudbalskog saveza, kao i u skladu sa ovim Pravilnikom odnosno Pravilnikom o nogometnim/fudbalskim takmičenjima.

Ako jedan od klubova u spajanju zadržava ime, mora se objaviti prestanak rada drugoga kluba, a u slučaju da se spajanjem dva kluba uzima novo ime zajedničkog kluba, dužni su prijaviti registraciju novoga kluba i prestanak rada klubova u spajanju.

Klub za vrijeme koje je određeno Ugovorom o sponzorstvu uz ime kluba može dodati i ime sponzora. U tom slučaju ime sponzora uz ime kluba prijaviće se nadležnom takmičarskom organu, a dopuna imena kluba neće se posebno registrovati prema odredbama ovoga Pravilnika.

Član 7.

Klub postaje član NS/FS BiH kada ga primi nadležni organ za registraciju i odluku o prijemu objavi u Službenom glasniku NS/FS BiH.

Nadležni organ za registraciju je obavezan da objavi odluku o registraciji kluba u Službenom glasniku u roku od 8 (osam) dana po njegovom prijemu.

Po izvršenoj registraciji klub ima pravo da se uključi u odgovarajuće prvo naredno

prvenstveno takmičenje.

Klub koji se ne uključi u takmičenje ne posjeduje statusna prava koja proizlaze iz članstva.

Član 8.

Klub se može istovremeno registrovati za futsal, nogomet/fudbal, odnosno ženski nogomet/fudbal, ako ispuni slijedeće uslove:

1. da u molbi za registraciju i prijem u članstvo navede da se registruje za futsal, nogomet/fudbal, odnosno ženski nogomet/fudbal;
2. da u statutu reguliše članstvo futsala, nogometa/fudbala, odnosno ženskog nogometa/fudbala;
3. da registruje najmanje 20 (dvadeset) igrača za nogomet/fudbal i 10 (deset) igrača za futsal, odnosno 15 (petnaest) igrača za ženski nogomet/fudbal;
4. da uplati članarinu i upisninu za klubove koje registruje i
5. da ima sopstveni ili ugovorom obezbijeđeni stadion za nogomet/fudbal te dvoranu za futsal.

Odluku o registraciji, u smislu ovog člana donose isti organi, na način i prema postupku iz ovog Pravilnika.

Član 9.

Klub prestaje da bude član NS/FS BiH ili mu prava iz članstva miruju, odlukom o brisanju iz članstva, odnosno odlukom o zamrzavanju statusnih prava.

Nadležni organ za registraciju donosi odluku iz predhodnog člana, koju treba da potvrdi izvršni organ nadležnog saveza, a odluka se objavljuje u Službenom glasniku NS/FS BiH.

III REGISTRACIJA IGRAČA

Član 10.

Igrač može biti registrovan nakon navršениh 7 (sedam) godina života. Registracija za igrača predstavlja licencu za igranje nogometa/fudbala.

1. Organ za registraciju igrača

Član 11.

Registraciju igrača i klubova vrši nadležni registracioni savez, na čijoj teritoriji se nalazi klub za koji se igrač registruje.

Nadležni registracioni savez određuje koji će organ vršiti registraciju igrača na njegovoj teritoriji.

Nadležni organ za registraciju obavezan je voditi registracije klubova i igrača putem COMET informacionog sistema.

Član 12.

Nadležni organ za registraciju igrača donosi odluke po zahtjevu za registraciju igrača.

O zahtjevu za registraciju mora se odlučiti najkasnije u roku od 8 (osam) dana od dana podnošenja zahtjeva.

U izuzetnim slučajevima, ako su svi uslovi za registraciju ispunjeni, registraciju može izvršiti registracioni organ, bez održavanja sjednice.

2. Registracija

Član 13.

Igrač može biti registrovan samo za jedan klub.

Činom registracije igrač je primio obavezu i saglasan je da će se pridržavati statuta i akata kluba, propisa NS/FS BiH, FIFA-e i UEFA-e.

Igrači mogu biti registrovani maksimalno za tri kluba u toku jedne sezone.

Tokom ovog perioda igrač ima pravo nastupa na službenim utakmicama samo za dva kluba.

Izuzetak od ovog pravila je situacija kada igrač koji prelazi iz jednog u drugi, a oba kluba pripadaju asocijacijama čije sezone takmičenja se preklapaju (tj. početak sezone ljeto – jesen, za razliku od zime – proljeće) može imati pravo da nastupa u službenoj utakmici za neki treći klub tokom predmetne sezone, pod uslovom da je u potpunosti ispoštovao svoje ugovorne obaveze prema svom prethodnom klubu.

U svim okolnostima mora se voditi računa o sportskom integritetu takmičenja.

Igrač naročito ne smije igrati službene utakmice za više od dva kluba koja se takmiče u prvenstvenom ili kup takmičenju u organizaciji NS/FS BiH u toku iste sezone, što će biti sankcionisano od strane nadležnih organa NS/FS BiH.

3. Registracijski period (prelazni rokovi)

Član 14.

Igrač može biti registrovan samo tokom jednog od dva godišnja registracijska (prelazna) perioda određena od strane nadležnog organa – izvršnog odbora NS/FS BiH.

Prvi Registracijski period počinje nakon završetka sezone i obično završava prije početka nove sezone. Ovaj period ne može trajati duže od 12 (dvanaest) sedmica.

Drugi registracijski period obično počinje u sredini sezone i ne može prelaziti 4 (četiri) sedmice. Dva registracijska perioda za sezonu će biti unešena u sistem praćenja transfera (TMS registar) najmanje 12 (dvanaest) mjeseci prije nego što stupe na snagu.

Igrači mogu biti registrovani samo ukoliko je zahtjev kluba valjano podnesen registracionom organu tokom registracionog perioda.

Izuzetno, izvan registracijskog perioda, može se registrovati:

1. profesionalni igrač ukoliko mu je ugovor istekao ili je raskinut prije završetka registracijskog perioda;
2. igrač koji se prvi put registruje;
3. igrač koji nije preregistrovan;
4. igrač amater kojem je istekao amaterski ugovor sa domaćim ili inostranim klubom prije završetka registracijskog perioda, ili je igrač amater bez ugovora dobio ispisnicu kluba prije završetka registracijskog perioda, a najkasnije 30 (trideset) dana nakon završetka registracijskog perioda.

NS/FS BiH je ovlašten registrovati takve igrače pod uslovom da je dužna pažnja posvećena sportskom integritetu relevantnog takmičenja.

4. Neregistrovani igrači

Član 15.

Ukoliko igrač koji nije registrovan u nadležnom registracionom savezu nastupi za klub na bilo kojoj službenoj utakmici, za takvog igrača će se smatrati da je nastupao nepropisno. Sankcije za nepropisno nastupanje se mogu izreći igraču i/ili klubu od strane nadležnih organa NS/FS BiH kao i organa entitetskih saveza ili organizatora takmičenja.

5. Registracija maloljetnih igrača koji su članovi nogometne/fudbalske škole ili akademije

Član 16.

Škole nogometa/fudbala, akademije i druga udruženja ili privredna društva koja obavljaju djelatnost nogometne/fudbalske obuke maloljetnika (u daljem tekstu: škola nogometa/fudbala), obavezne su nadležnom registracionom savezu na čijem području imaju sjedište prijaviti sve maloljetne igrače koje podučavaju i treniraju.

Klubovi koji imaju školu nogometa/fudbala koja je pravno, finansijski ili de facto vezana uz klub, obvezni su nadležnom registracionom savezu na čijem području imaju sjedište prijaviti sve maloljetne igrače koje podučavaju i treniraju, a koji nisu registrovani za klub po odredbama ovog Pravilnika.

Obavezom prijave obuhvaćeni su i maloljetni igrači koji nemaju državljanstvo BiH.

Registar maloljetnih igrača koji treniraju u školama nogometa/fudbala iz ovog člana sadrži ime i prezime igrača, mjesto i datum rođenja, državljanstvo i naziv škole nogometa/fudbala.

Putem prijave škole nogometa/fudbala, akademije i igrači obavezuju se igrati nogomet/fudbal u skladu sa Statutom FIFA-e te poštivati i promicati etička načela organizovanog nogometa/fudbala.

Izvršni odbor NS/FS BiH propisat će obrazac na kojoj škole nogometa/fudbala trebaju prijavljivati maloljetne igrače.

Povreda odredbi ovog člana je kažnjiva. Nadležno disciplinsko tijelo će provesti postupak protiv učinioca prekršaja.

6. Registracija igrača koji dolaze iz inostranih klubova

Član 17.

Registracija igrača koji dolaze iz inostranih klubova može se izvršiti nakon dobijanja certifikata, u skladu sa odredbama ovog Pravilnika.

Igrači strani državljanima prije registracije za klub, moraju nadležnom registracionom savezu dostaviti boravišnu dozvolu na teritoriji BiH. Registracioni savez može izvršiti registraciju takvog igrača i uz dostavljanje dokaza da je nadležnom državnom organu podnesen zahtjev za izdavanje boravišne dozvole, ali igrač ima pravo nastupa za klub tek po dobijanju navedene dozvole.

Obaveza kluba je da ishodi dobijanje boravišne dozvole za igrača.

Klub može imati više registrovanih igrača stranih državljanima, a tačan broj igrača će biti regulisan propozicijama pojedinog takmičenja.

7. Preregistracija

Član 18.

Preregistracija je postupak ponovne registracije svih igrača za svoje sadašnje klubove u cilju ažuriranja registra aktivnih igrača u svakom pojedinačnom klubu.

Izvršni odbor nadležnog saveza za registraciju može donijeti odluku da se izvrši preregistracija svih registrovanih igrača na svom području.

Odluka o preregistraciji igrača objavljuje se u Službenom glasniku NS/FS BiH i službenim glasnicima nadležnih saveza za registraciju, najkasnije 15 (petnaest) dana prije početka registracije.

Preregistracija se vrši prema potrebi, a u skladu sa odlukom o načinu preregistracije igrača o čemu odluku donosi Izvršni odbor NS/FS BiH.

8. Registracija bez ispisnice i brisovnice

Član 19.

Registracija igrača koji je u registracionom periodu stekao uslove za promjenu kluba prema odredbama ovog Pravilnika, a nije dobio ispisnicu i brisovnicu, biće izvršena bez ispisnice, odnosno brisovnice, uz podnošenje ostalih dokumenata predviđenih ovim Pravilnikom, pod uslovom da novi klub umjesto ispisnice dostavi kopiju zahtjeva kojim je igrač tražio ispisnicu, sa dokazom da je zahtjev dostavljen klubu, a ukoliko mijenja teritoriju saveza, kopiju zahtjeva sa dokazom da je tražio brisovnicu.

Svi profesionalni igrači klubova koji su odustali od takmičenja u bilo koje vrijeme mogu biti registrovani za drugi klub najkasnije 30 (trideset) dana prije odigravanja rasporedom utvrđene posljednje prvenstvene utakmice. Igrači amateri se mogu registrovati samo u narednom registracionom periodu.

Član 20.

Za registraciju igrača koji se registruju po osnovu ustupanja, ispisnica i brisovnica nisu potrebne, kao i za igrača kojem je ugovor istekao, a za igrače koji su dobili raskid profesionalnog ugovora sporazumno ili na osnovu opravdanih razloga ili opravdanih sportskih razloga, ili je profesionalni ugovor istekao, nije potrebna ispisnica.

9. Certifikat o međunarodnom transferu (ITC)

Član 21.

Igrač registrovan za klub neke od asocijacija – nacionalnih saveza članica FIFA-e može biti registrovan kao igrač za klub unutar NS/FS BiH, samo kada NS/FS BiH dobije međunarodni certifikat (u daljem tekstu: ITC) o transferu od prethodne asocijacije.

ITC nije potreban za igrače mlađe od 12 (dvanaest) godina.

9.1 Izdavanje ITC-a za igrača profesionalca

Član 22.

Profesionalnom igraču registrovanom za klub u NS/FS BiH neće se izdati ITC ukoliko se dokaže da mu ugovor nije istekao, nije sporazumno raskinut, ili nije raskinut iz opravdanih, ili sportski opravdanih razloga.

Član 23.

Prijavu za registraciju profesionalnog igrača po osnovu ITC-a novi klub mora podnijeti nadležnom registracionom savezu, izuzev ako se ne radi o igraču iz čl. 20. ovog Pravilnika. Uz prijavu će morati biti priložena kopija ugovora između kluba i igrača.

Član 24.

Profesionalni igrač nema pravo nastupa na zvaničnim utakmicama svog novog kluba, dok prethodni nacionalni savez ne izda ITC.

Po prijemu zahtjeva kluba, NS/FS BiH će odmah, a najkasnije u roku od 3 (tri) dana zatražiti od prethodnog saveza da izda ITC za profesionalnog igrača.

Kod potraživanja ITC-a za profesionalne igrače, primjenjuje se Aneks 3 FIFA Pravilnika o statusu i transferu igrača (FIFA TMS Sistem).

Posljednji dan kad se može tražiti ITC je zadnji dan registracionog perioda utvrđenog u NS/FS BiH. Izuzetno, ITC se može tražiti i nakon isteka registracionog perioda za igrače koji su slobodni u registracionom periodu (odnosno za igrače za koje se primjenjuje čl. 20. ovog Pravilnika).

U slučaju da u NS/FS BiH bude dostavljen ITC od drugog nacionalnog saveza, a da

NS/FS BiH nije tražio ITC, igrač ne može biti registrovan za klub na teritoriji BiH.

Član 25.

Izuzetno, u slučaju da NS/FS BiH ne primi odgovor na zahtjev za izdavanje ITC u roku od 15 (petnaest) dana od dana podnesenog zahtjeva, profesionalni igrač će biti registrovan za novi klub na privremenoj osnovi (privremena registracija).

Nakon prijema ITC-a, NS/FS BiH je dužan pismeno obavijestiti asocijaciju-e klub/ova koji je/su trenirao/li i školovao/li igrača između 12. i 21. godine života o registraciji tog igrača kao profesionalca.

Privremena registracija će važiti godinu dana, računajući od dana podnesenog zahtjeva.

Igrač registrovan po osnovu privremene registracije ne može potpisati profesionalni ili amaterski ugovor u vrijeme trajanja privremene registracije.

Privremena registracija postaje trajna ukoliko certifikat ili valjani razlozi za neizdavanje certifikata nisu dostavljeni tokom jedne godine, računajući od dana podnesenog zahtjeva.

Odredba iz prethodnog stava se odnosi jednako na profesionalne igrače i igrače amatere.

Član 26.

Privremenu registraciju tokom njenog trajanja Komitet za status i transfer igrača NS/FS BiH može povući ako prethodni nacionalni savez podnese valjane razloge zbog kojih nije odgovorio na zahtjev za izdavanje ITC-a.

U slučajevima iz prethodnog stava, klub nema sportskih posljedica za utakmice odigrane sa igračem sa privremenom registracijom.

Član 27.

U slučaju da je igrač jednostrano raskinuo ugovor, ne može se podnijeti zahtjev za ITC do isteka roka na koji je prethodni ugovor zaključen, osim u slučaju da igrač dobije ispisnicu prethodnog kluba.

Član 28.

Navedena pravila u prethodnim članovima u vezi izdavanja ITC-a za profesionalne igrače jednako se odnose i na igrača koji zadobija status amaterra.

Član 29.

Prilikom izdavanja ITC-a za igrače profesionalce, NS/FS BiH će uz ITC priložiti i pasoš igrača.

Član 30.

Po prijemu zahtjeva za izdavanje certifikata NS/FS BiH će, nakon što prethodno zatraži očitovanje kluba u kojem je nastupao igrač za koji je zatražen ITC, u roku od sedam dana izdati ITC, ili će obavijestiti nacionalni savez koji traži ITC o razlozima neizdavanja ITC-a.

Član 31.

Za sve odredbe koje nisu predviđene ovim Pravilnikom primjenjivat će se odredbe FIFA Pravilnika o statusu i transferu igrača.

9.2 Izdavanje ITC-a za Amaterskog igrača

Član 32.

Aplikaciju za registraciju Amatera mora podnijeti novi klub novoj asocijaciji tokom jednog od Registracijskih perioda koje je utvrdila ta asocijacija.

Po prijemu aplikacije, nova asocijacija je dužna odmah tražiti od prethodne asocijacije da izda ITC za igrača („Zahtjev za ITC“).

Prethodna asocijacija je dužna u roku od sedam dana od primitka zahtjeva za ITC izdati ITC novoj asocijaciji.

Ako nova asocijacija ne dobije odgovor na zahtjev za ITC u roku od 30 (trideset) dana od podnošenja zahtjeva za ITC, ona će odmah registrovati amatera za novi klub na privremenoj osnovi („Privremena registracija“). Privremena registracija postaje stalna jednu godinu nakon Zahtjeva za ITC. Komitet za status igrača može povući privremenu registraciju, ako tokom tog jednogodišnjeg perioda, prethodna asocijacija iznese validne razloge koji objašnjavaju zašto nije odgovorila na zahtjev za ITC.

Prednje navedena pravila i procedure važe i za amatere koji nakon prelaska u novi klub steknu status profesionalnog igrača.

10. Ustupanje profesionalnog igrača

Član 33.

Samo profesionalni igrač može biti ustupljen drugom klubu na osnovu pisanog sporazuma između igrača i predmetnih klubova. Svako takvo ustupanje je predmet istih pravila koja se primjenjuju za transfer igrača, uključujući i odredbe o obeštećenju za treniranje i mehanizam solidarnosti.

O ustupanju igrača zaključuje se pismeni sporazum između klubova i igrača, u nadležnom savezu čiji je član klub koji ustupa igrača.

Ustupanje igrača vrši se isključivo u registracionom periodu.

Sporazum potpisuju predstavnici zainteresovanih klubova, igrač i ovlašteno/a lice/a nadležnog/ih registracionog/ih saveza.

Ugovor se zaključuje u 4 (četiri) primjeraka.

Minimalni period ustupanja igrača će biti vrijeme između dva registracijska perioda.

Klub koji je prihvatio igrača na osnovu ustupanja ne može vršiti transfer igrača u treći klub bez pisanog ovlaštenja predmetnog igrača i kluba koji je ustupio igrača.

Ustupanje igrača ne smatra se promjenom kluba i vrši se u skladu sa odredbama ovog Pravilnika, osim u smislu primjene odredbi koje se odnose na kompenzacije za treniranje i mehanizam solidarnosti.

Član 34.

Ustupljeni igrač u smislu ovog Pravilnika postaje na određeno vrijeme član kluba kome je ustupljen i njegovo članstvo prestaje istekom roka na koji je ustupljen ili raskidom roka o ustupanju, a igrač bez ponovne registracije ima pravo nastupa za klub koji ga je ustupio, što se upisuje u legitimaciju igrača.

Član 35.

Ustupanje igrača vrši se na period od najmanje 6 (šest), a najviše 12 (dvanaest) mjeseci, uz mogućnost obnove ugovora. Ukoliko sporazum o ustupanju ističe u vrijeme trajanja prelaznog roka, smatra se da je takav sporazum istekao prvog dana nakon posljednje zvanične utakmice kluba u koji je igrač ustupljen.

Sporazum o ustupanju igrača važi do datuma do kojeg je zaključen ukoliko ga klubovi i igrača nisu sporazumno ili na drugi način raskinuli, odnosno produžili.

U toku takmičarske sezone klub može po osnovu ustupanja registrovati najviše četiri igrača, s tim što najviše tri mogu nastupati na jednoj utakmici.

Član 36.

Sporazum kojim se igrača ustupaju klubovima Premijer lige verifikuju se u NS/FS BiH i objavljuju se u Službenom glasniku NS/FS BiH, a sporazumi o ustupanju ostalih igrača verifikuju se u entitetskim savezima i objavljuju se u službenim glasnicima entitetskih saveza.

Član 37.

Sporazum o ustupanju igrača može biti raskinut uz saglasnost klubova i igrača u registracionom periodu.

Sporazum o ustupanju igrača ne može se raskinuti prije proteka roka od 6 (šest) mjeseci, računajući od dana potpisanog sporazuma.

Sporazum o raskidu sporazuma o ustupanju objavljuje se u Službenom glasniku NS/FS BiH za igrače klubova Premijer lige, a u službenim glasnicima entitetskih saveza za ostale igrače.

IV POSEBNE ODREDBE VEZANE ZA DOKUMENTACIJU POTREBNU ZA REGISTRACIJU IGRAČA

1. Predmet registracije

Član 38.

U cilju provođenja registracije igrača, klub je dužan da dostavi uredan predmet registracije koji sadrži:

1.1. Za igrača koji se registruje prvi put:

- a) zahtjev kluba sa popisom dokumenata koji se prilažu za registraciju;
- b) 2 (dva) primjerka prijave za registraciju sa fotografijama, uz potpis igrača (u slučaju maloljetnog igrača obavezan je i potpis jednog od roditelja ili staratelja) i predstavnika kluba, ovjerenu pečatom kluba, od kojih je po jedna za klub i registracioni savez;
- c) obrazac legitimacije sa fotografijom i upisanim ljekarskim pregledom;
- d) izvod iz matične knjige rođenih, ili lična karta;
- e) Izjavu igrača (ili staratelja) da nije bio registrovan odnosno preregistrovan za drugi klub u zemlji ili inostranstvu. Ukoliko se radi o igraču stranom državljaninu ili igraču koji je imao prebivalište na teritoriji druge države, registracioni savez je takvu izjavu dužan provjeriti putem Generalnog sekretarijata NS/FS BiH.
- f) potvrda o izvršenoj uplati takse za registraciju i
- g) 3 (tri) primjerka ugovora, ili aneksa ugovora ukoliko su zaključeni.

U COMET sistem se obavezno unose dokumenti iz tački b), d) i g).

1.2. Za igrača koji prelazi iz kluba u klub:

- a) zahtjev kluba sa popisom dokumenata koji se prilažu za registraciju;
- b) 2 (dva) primjerka prijave za registraciju sa fotografijama, uz potpis igrača i predstavnika kluba, ovjerenu pečatom kluba, od kojih je jedan klubu i registracionom savezu;
- c) ispisnicu od dosadašnjeg kluba, ili dokaz da je igrač istu tražio od kluba u registracionom periodu;
- d) brisovnicu, ukoliko igrač mijenja teritoriju saveza nadležnog za registraciju igrača, ili dokaz da je igrač istu tražio od nadležnog organa i da ispunjava uslove za promjenu kluba;
- e) dokaz o raskidu ugovora;
- f) sportsku legitimaciju;
- g) dokaz da su ispunjeni uslovi iz ovog Pravilnika, ukoliko se koriste registracioni periodi, u skladu sa ovim Pravilnikom.
- h) certifikat nadležnog nacionalnog saveza, ukoliko je riječ o igraču koji dolazi iz inostranog kluba;
- i) 3 (tri) primjerka ugovora ili aneksa ugovora, ukoliko su zaključeni;
- j) pasoš igrača za igrače starije od 12 (dvanaest) godina;
- k) dokaz o uplati taksi za objavu registracije.

U COMET sistem se obavezno unose dokumenti iz tački b), c), h) i i).

1.3. Za igrača koji se ustupa

- a) zahtjev kluba za registraciju igrača sa popisom dokumenata koji su prilažu za registraciju;
- b) dva primjerka prijave za registraciju, ovjerenu pečatom kluba, sa nalijepljenim fotografijama igrača, uz potpis igrača i predstavnika kluba;
- c) pet primjeraka sporazuma klubova, u kojima je navedeno kojem se klubu igrač ustupa i na koji period, potpisan od predstavnika zainteresovanih klubova, igrača i predstavnika saveza za registraciju;
- d) certifikat za igrače koji se ustupaju od klubova iz inostranstva;
- e) potvrda o uplaćenju taksi za objavu sporazuma o ustupanju.

U COMET sistem se obavezno unose dokumenti iz tački b), c) i d).

2. Obrasci za registraciju

Član 39.

Sadržaj teksta obrazaca prijave za registraciju, ispisnice, brisovnice, pasoša igrača, abecedne i matične knjige, okvirnih obrazaca ugovora, sporazuma o ustupanju, sporazumnih raskida ugovora, sportske legitimacije i druge obrasce u vezi sa registracijom igrača, usvaja Izvršni odbor NS/FS BiH.

3. Prijava za registraciju

Član 40.

Prijava za registraciju profesionalnog igrača mora biti podnesena zajedno sa primjerkom igračevog ugovora.

Prijava za registraciju sadrži slijedeće podatke: prezime, očevo ime i ime igrača, datum i mjesto rođenja, klub kojem pristupa sa naznakom nogomet/fudbal, futsal, datum potpisa prijave, jedinstveni matični broj i dosadašnje članstvo.

Igrač je dužan pružiti tačne podatke iz prijave i to potvrditi potpisom. Predstavnik kluba dužan je u prijavi za registraciju navesti tačne podatke i potpisom i pečatom kluba potvrditi da je igrač svojeručno i određenog dana potpisao prijavu za registraciju, odnosno ovjeriti tačnost podataka.

Za pružanje netačnih podataka igrač i klub, ukoliko se utvrdi da je za njih znao ili je mogao znati, snose odgovornost po odredbama Disciplinskog pravilnika NS/FS BiH, a u odnosu na registraciju postupa se po odredbama ovog Pravilnika.

Član 41.

Igrač ne može odustati od prijave za registraciju, niti potpisati novi prijavu za drugi klub, osim na način predviđen ovim Pravilnikom.

Izuzetno od odredbe iz prethodnog stava, ako klub za koji je igrač potpisao prijavu ne podnese dokumentaciju za registraciju u roku od osam dana od dana potpisa prijave, igrač koji želi da promijeni klub može potpisati prijavu za novi klub, ukoliko ne postoje smetnje predviđene ovim Pravilnikom.

4. Ispisnica

Član 42.

Za prelazak igrača u drugi klub, pored ostalog što je predviđeno ovim Pravilnikom, potrebna je ispisnica.

Ispisnicu daje klub igraču, a sadrži slijedeće podatke:

- a) prezime, ime oca i ime igrača;

- b) datum i mjesto rođenja;
- c) jedinstven matični broj;
- d) datum posljednje izvršene registracije i pravo nastupa;
- e) ime kluba iz kojeg je došao i dosadašnji status;
- f) eventualna kazna ili suspenzija od strane nogometnog/fudbalskog organa i vrijeme njihovog trajanja;
- g) datum raskida ugovora;
- h) broj javnih opomena registriranih u zapisnicima prvenstvenih i kup utakmica u toku takmičarske godine - sezone u kojoj se izdaje ispisnica;
- i) i eventualno druge primjedbe, ako je klub evidentirao;

Član 43.

Registrovani igrač koji želi da promijeni klub, može zatražiti ispisnicu koju mu je klub dužan izdati ako su ispunjeni uslovi propisani ovim Pravilnikom.

Klubu se upućuje pismeni zahtjev uz pismenu ovjeru kluba o prijemu takvog zahtjeva, ili se on šalje preporučeno poštom kada se radi o registracionom periodu.

Ispisnica važi od dana izdavanja.

Registracija igrača za drugi klub ne može se izvršiti bez ispisnice, izuzev u slučajevima koji su posebno predviđeni ovim Pravilnikom.

5. Sportska legitimacija

Član 44.

Svaki registrirani igrač ima legitimaciju koju izdaje nadležni organ za registraciju.

Ako igrač mijenja klub, predhodni klub je dužan da mu preda legitimaciju.

Ako igrač ne dobije legitimaciju, onda će se na zahtjev kluba za koji se registruje izdati duplikat legitimacije, pod istim brojem koji je imao ranije, ako igrač ispunjava uslove za promjenu kluba.

Ako se legitimacija izgubi ili postane neupotrebljiva, klub je dužan da pribavi duplikat legitimacije. Duplikat će imati broj izgubljene – neupotrebljive legitimacije.

Nadležni organ za registraciju dužan je objaviti izdavanje duplikata legitimacije u Službenom glasniku NS/FS BiH.

Igrači koji igraju u klubovima na teritoriji NS/FS BiH, obavezni su na utakmicama nastupiti sa sportskim legitimacijama NS/FS BiH.

Kada igrač napušta klub, kopija sportske legitimacije obavezno ostaje u dokumentaciji registracionog saveza.

6. Brisovnica

Član 45.

U slučaju prelaska igrača u klub koji se nalazi na teritoriji drugog registracionog saveza, igrač je dužan da pismeno traži potvrdu o brisanju iz evidencije registriranih igrača.

Nadležni organ za registraciju je dužan da odmah izda potvrdu o brisanju ili obavijest da li postoji neka smetnja za registraciju igrača za novi klub, u koju unosi podatak pod kojim brojem je evidentirana sportska legitimacija za koju se traži brisovnica.

Uz zahtjev se prilaže ispisnica, ili dokaz da je ista tražena, ili dokaz da je ugovor istekao, ili da je raskinut.

Kod izdavanja brisovnice, nadležni organ za registraciju je dužan izvršiti provjeru tačnosti i potpunosti podataka navedenih u ispisnici, a ukoliko to nije slučaj, mora od kluba zatražiti da istu tačno i precizno popuni. Također, ukoliko je igrač pod suspenzijom, podaci o istoj moraju biti navedeni i u brisovnici u rubrici „Primjedbe“.

Brisovnica važi od dana izdavanja.

Član 46.

Smatrat će se da je igrač brisan iz evidencije i da ne postoji nikakva smetnja za registraciju za novi klub, iako nema brisovnice, ako je igrač podnio zahtjev za izdavanje potvrde o brisanju u registracionom periodu i za to ima dokaze, pod uslovom da je uz zahtjev priložio ispisnicu ili zahtjev za ispisnicu, bez obzira što mu organ nadležan za registraciju nije izdao brisovnicu i pod uslovom da su ispunjeni drugi uslovi za registraciju za novi klub.

Registracija igrača je nepravilno izvršena ako je izvršena bez potvrde o brisanju, a nije postupljeno u skladu sa ovim članom, ili postoje druge smetnje za pravilnu registraciju u smislu ovog Pravilnika.

Član 47.

Brisanje iz evidencije registrovanih igrača saveza vrši organ nadležan za registraciju na zahtjev igrača, uz priloženu ispisnicu ili dokaz da je istu igrač pismeno tražio od dosadašnjeg kluba i dokaz da mu je ugovor istekao, odnosno raskinut.

7. Pasoš igrača

Član 48.

Registracijski organ je obavezan dostaviti klubu za koji je igrač registrovan, pasoš igrača koji sadrži sve relevantne podatke o igraču. U pasošu igrača će biti naznačeni klub/ovi za koji je igrač bio registrovan počevši od sezone svog 12. (dvanaestog) rođendana. Ukoliko rođendan igrača pada između dvije sezone, igrač će biti upisan u pasoš igrača za klub za koji je bio registrovan u sezoni nakon svog rođendana.

Pasoš igrača sadrži: ime i prezime igrača, datum i mjesto rođenja, državljanstvo, kategoriju kluba, datum prve i svih slijedećih registracija, status igrača, dodatni podaci (trajanje profesionalnih ugovora i dr.), broj prijave za registraciju, potpis i pečat predstavnika registracionog saveza.

Pasoš igrača izdaje registracioni savez sa čijeg područja igrač prelazi u novi klub, i obavezno sadrži informacije o svim klubovima za koje je igrač bio registrovan.

Nadležni registracioni savez odgovara za tačnost i potpunost podataka unesenih u pasoš igrača.

Kopija pasoša ostaje u arhivi nadležnog saveza.

V OBJAVA REGISTRACIJE

Član 49.

Registracija igrača klubova Premijer lige BiH objavljuje se u Službenom glasniku NS/FS BiH.

Registracija ostalih igrača objavljuje se u službenom glasniku entitetskog saveza.

Službeni glasnik svakog od saveza se može štampati ili objavljivati na web stranici datog saveza. Oba načina objave imaju jednako pravno dejstvo.

Član 50.

Tekst za objavu registracije u Službenom glasniku NS/FS BiH, nadležni savez za registraciju može unijeti putem Comet sistema nakasnije do četvrtka do 17.00 sati, za broj koji izlazi petkom, što se objavljuje u Službenom glasniku na zvaničnoj web stranici NS/FS BiH. Kasnije dostavljene prijave za registraciju igrača a bit će objavljene u narednom broju od kada teče pravo nastupa igrača.

Kod registracije igrača iz inostranstva, registracionom savezu se, uz ostalu dokumentaciju, obavezno dostavlja kopija ITC-a, a isti mora biti zaprimljen i od strane naležnog

saveza unesen u Comet sistem prije objave registracije igrača u Službenom glasniku NS/FS BiH, ili najkasnije do četvrtka do 17.00 sati.

Član 51.

Redovni broj Službenog glasnika NS/FS BiH se objavljuje na zvaničnoj web stranici NS/FS BiH jednom sedmično i to svakog petka, odnosno u roku koji odredi Izvršni odbor NS/FS BiH, a vanredni broj po potrebi.

Član 52.

U slučaju neblagovremenog izlaska iz štampe Službenog glasnika NS/FS BiH smatrat će se da su ispunjeni uslovi za objavu registracije, ako se utvrdi da je tekst za objavu registracija predat u roku koji obezbeđuje prijem teksta objave u generalni sekretarijat do utvrđenog vremena.

Registracija koja ne bude objavljena, a utvrdi se da je tekst za objavu registracija blagovremeno dostavljen, biće objavljen u narednom broju, sa napomenom da važi od dana kada je registracija trebala biti objavljena.

Član 53.

Objava registracija izvršenih u registracionom periodu vrši se najkasnije 7 (sedam) dana od posljednjeg dana prelaznog roka, a spisak preregistrovanih igrača najkasnije 15 (petnaest) dana od posljednjeg dana iz odluke o preregistraciji igrača.

Izuzetno od predhodnog stava, registracija može biti objavljena i poslije ovog roka, ako se utvrdi da je zahtjev za registraciju sa potrebnom dokumentacijom ili zahtjev za certifikat podniet u registracionom periodu, a registracija do tog datuma nije izvršena ili objavljena bez krivnje kluba.

Za registraciju igrača iz prethodnog stava važe odredbe za registraciju igrača u registracionom periodu, sa datumom sjednice na kojoj je registracija izvršena.

VI PRAVO NASTUPA

Član 54.

Igrač stiče pravo nastupa na prijateljskim utakmicama danom registracije, a na prvenstvenim i kup utakmicama danom objave registracije. Igrač koji dolazi iz inostranstva ima pravo nastupa za svoj klub ukoliko je ITC za istoga zaprimljen najkasnije do četvrtka do 17.00 sati.

Igrač koji je registrovan za klub do kraja prelaznog roka ima pravo nastupa za taj klub danom objave registracije u službenom glasniku, bez obzira da li je nastupao za drugi klub u bilo kojem rangu takmičenja, u istoj takmičarskoj polusezoni.

U svim okolnostima mora se voditi računa o sportskom integritetu takmičenja.

Član 55.

Pravo nastupa danom objave registracije imaju igrači koji se u registracionom periodu registruju u skladu sa odredbama ovog Pravilnika po slijedećim osnovama:

1. Ukoliko se registruju prvi put;
2. Ukoliko dolaze iz domaćeg kluba;
3. Ukoliko dolaze iz inostranog kluba;
4. Ukoliko dolazi iz inostranog kluba i registruju se privremeno;
5. Ukoliko se registruju po osnovu ustupanja;
6. Ukoliko se radi o igračima amaterima klubova koji su odustali od takmičenja;
7. Ukoliko se radi o igraču koji nije preregistrovan.

Član 56.

U slučaju da je objavljena registracija osporena pismenim prigovorom u roku utvrđenom za ulaganje prigovora, pa se pravosnažnom odlukom utvrdi da je prigovor osnovan, registracija se poništava.

Klub koji je izvršio nepravilnu registraciju snosi takmičarske i disciplinske posljedice, a odgovorna lica u klubu i savezu koja su znala ili trebala znati da nije bilo uslova za registraciju igrača, biće disciplinski sankcionisana.

Član 57.

U slučajevima kada se ustanovi da je igrač registrovan suprotno odredbama ovog Pravilnika, a takvo saznanje se stekne poslije roka za ulaganje prigovora za registraciju, registracija ostaje na snazi kao punovažni akt, s tim što će odgovorna lica kluba i saveza koja su takvu registraciju omogućila biti disciplinski sankcionisana, a takmičarski rezultati ostaju nepromijenjeni.

VII PROMJENA KLUBA

1. Pravo na promjenu kluba

Član 58.

Igrači mogu promijeniti klub u ljetnom i zimskom registracionom periodu na način i u skladu sa postupkom predviđenim ovim Pravilnikom i Pravilnikom FIFA-e.

Naknada za treniranje igrača ili druge finansijske obaveze igrača prema klubu ne mogu biti smetnja igraču za promjenu kluba, a sporna pitanja u vezi sa izvršavanjem tih obaveza rješavaju se u redovnom postupku, na način koji je predviđen ovim Pravilnikom.

Ustupanje igrača ne smatra se promjenom kluba u smislu stava 1. ovog člana, ali se primjenjuju odredbe o kompenzaciji za treniranje i mehanizmu solidarnosti.

2. Odustajanje od promjene kluba

Član 59.

Igrač koji je dobio ispisnicu od kluba, pa uz saglasnost kluba za koji je potpisao prijavu odustane od prijave prije nego što je registracija izvršena, može se u registracionom periodu vratiti u klub za koji je nastupao do tada i steći pravo nastupa po prethodnoj registraciji.

Za provođenje ove registracije klub dostavlja legitimaciju, pismenu izjavu igrača kojom potvrđuje da odustaje od prijave za drugi klub i pismenu potvrdu novog kluba za koji je igrač potpisao prijavu, da je saglasan sa izjavom igrača.

Također, igrač koji je otišao u inostranstvo, i za kojeg je izdat međunarodni certifikat o transferu (ITC) u korist druge asocijacije, a klub u inostranstvu u međuvremenu odustane od njegove registracije, može ponovo biti registrovan za klub u BiH, pod uslovom da je dostavio dokaz o tome da nije registrovan u inostranstvu, i da ispunjava uslove iz čl. 20. ovog Pravilnika.

Ukoliko je igrač dobio ispisnicu i brisan je iz evidencije registrovanih igrača, pa odustane od namjere da se prijavi za drugi klub, može se vratiti u prethodni klub, a ima pravo nastupa po prethodnoj registraciji, pod uslovom da je savez koji je izdao brisovnicu poništio brisanje igrača u toku registracionog perioda.

VIII ZAŠTITA MALOLJETNIH IGRAČA

Član 60.

Međunarodni transferi igrača dozvoljeni su samo ako igrač ima više od 18 (osamnaest) godina.

Primjenjuju se naredna tri izuzetka od ovog pravila:

- a) Igračevi roditelji sele u zemlju u kojoj je lociran novi klub iz razloga koji nisu vezani za nogomet/fudbal; ili
- b) Transfer se odvija na teritoriji Evropske Unije (EU) ili Evropskog Ekonomskog Područja (EEA) a igrač ima između 16 (šesnaest) i 18 (osamnaest) godina. U tom slučaju novi klub mora ispuniti sljedeće minimalne obaveze:

1. Igraču obezbijediti odgovarajuće nogometno obrazovanje i/ili trening u skladu s najvišim državnim standardima;

2. Igraču, pored nogometnog obrazovanja, garantovati akademsko i/ili školsko i/ili stručnoškolsko obrazovanje i/ili obuku, koji će igraču omogućiti da ostvari karijeru izvan nogometa ako prestane da se bavi profesionalnim nogometom;

3. Napraviti sve potrebne aranžmane kako bi se osiguralo da se o igraču brine na najbolji mogući način (optimalan životni standard kod porodice domaćina ili u klupskom smještaju, imenovanje mentora u klubu, itd.);

4. Prilikom registracije takvog igrača relevantnoj Asocijaciji obezbijediti dokaz da ispunjava gore navedene uslove; ili

c) Igrač živi ne dalje od 50 km od državne granice, a klub za koji igrač želi da se registruje u susjednoj asocijaciji takođe se sa svoje strane nalazi 50 km od te granice. Maksimalna udaljenost između domicila igrača isjedišta kluba smije biti 100 km. U tim slučajevima igrač mora nastaviti živjeti u svom domu, a dvije relevantne asocijacije moraju dati svoju izričitu saglasnost.

Uslovi iz ovog člana primjenjuju se i na svakog igrača koji nije nikad ranije bio registrovan za neki klub i koji nije državljanin zemlje u kojoj želi da se registruje po prvi put.

Svaki međunarodni transfer u skladu sa stavom 2. i svaka prva registracija u skladu sa stavom 3. ovog člana, predmet je saglasnosti potkomiteta FIFA-e kojeg je imenovao Komitet za status i transfer igrača FIFA-e u tu svrhu. Aplikaciju za saglasnot treba podnijeti asocijacija koja želi registrovati igrača. Prethodna asocijacija će imati priliku da dostavi svoje izjašnjenje.

Saglasnost potkomiteta treba pribaviti prije bilo kakvog zahtjeva asocijacije za izdavanje Certifikata o međunarodnom transferu i/ili prve registracije. Disciplinska komisija će sankcionisati svako kršenje ove odredbe u skladu sa Disciplinskim pravilnikom.

Pored asocijacije koja potkomitetu nije podnijela zahtjev za saglasnost, sankcije mogu biti izrečene i prethodnoj asocijaciji za izdavanje Certifikata o međunarodnom transferu bez saglasnosti potkomiteta, kao i klubovima koji su se dogovorili o transferu maloljetnog igrača.

Procedure apliciranja potkomitetu za prvu registraciju i Certifikat o međunarodnom transferu maloljetnog igrača nalaze se u Dodatku 1 ovog Pravilnika.

IX STATUS IGRAČA

Član 61.

Igrači koji učestvuju u organizovanom nogometu/fudbalu su ili ameteri ili profesionalci.

Samo registrovani igrači imaju pravo učešća u organizovanom nogometu/fudbalu.

Profesionalac je igrač koji ima pismeni ugovor sa klubom čija su primanja veća od troškova koje prouzrokuje u zamjenu za svoje nogometne aktivnosti. Svi ostali igrači se smatraju amaterima.

Klubovi su dužni sve registrovane igrače osigurati od povreda, trajnog invaliditeta i smrti, ako su isti nastali prilikom treniranja, takmičenja, putovanja na takmičenje i putovanja na treninge.

1. Igrači amateri

Član 62.

Igrač amater je igrač koji se bavi nogometom/fudbalom bez naknade.

Član 63.

Igrač amater u pravilu se registruje za klub bez zaključivanja ugovora sa klubom.

Igrač amater i klubovi Premijer lige izuzetno mogu zaključiti amaterski ugovor, ako odluče da ugovore posebne uslove pod kojima igrač nastupa, kao što su stipendija za školovanje, hranarina i drugo, ali najviše sa 5 (pet) igrača registrovanih u omladinskoj školi tog kluba.

Klubovi Prvih liga moraju imati sa igračima zaključene profesionalne ili amaterske ugovore.

Klubovi Drugih liga moraju sa igračima zaključiti amaterski ugovor.

Ako su primanja igrača amatera veća od troškova koje nastanu za klub u zamjenu za igračevu nogometnu/fudbalsku aktivnost, takav igrač se smatra profesionalnim igračem bez obzira na vrstu ugovora, a što će nadležni organ cijeniti u svakom konkretnom slučaju.

Troškovi koje je klub dužan izmiriti igraču amateru su:

- a) troškovi puta i smještaja, kada klub odlazi na takmičenje i pripreme,
- b) troškovi pojačane ishrane,
- c) troškovi radne/sportske opreme,
- d) troškovi putovanja.

Ukoliko klub i igrač ugovore stipendiranje igrača, troškovi mjesečne stipendije za školovanje igrača mogu se odrediti u iznosu predviđenom odredbama Zakona o porezu na dohodak FBiH i RS.

Član 64.

Amaterski ugovori zaključuju se i raskidaju prema proceduri propisanoj za profesionalne ugovore, u skladu sa odredbama ovog Pravilnika.

Sporazumni raskidi amaterskih ugovora mogu se vršiti tokom cijelog trajanja takmičarske sezone, dok je raskid amaterskih ugovora po svim drugim osnovama dozvoljen samo u registracionim periodima.

Član 65.

Za igrače amatere koji zakluče ugovor sa klubom primjenjuju se odredbe ovog Pravilnika koje se odnose na ostale igrače amatere, kada su u pitanju registracioni rokovi i druge odredbe koje se odnose na amatere.

Izuzetno, igrač amater koji je zaključio ugovor s klubom ne može biti registrovan za novi klub dok mu traje ugovorna obaveza.

Igrač amater može biti registrovan samo u registracionom roku, izuzev igrača koji se prvi put registruje.

Igrač koji je navršio 14 (četrnaest) godina može zaključiti amaterski ugovor u trajanju od jedne godine, ukoliko se ugovor zaključuje u ljetnom registracionom periodu.

Amaterski ugovor se može zaključiti i tokom takmičarske godine i u tom slučaju traje do kraja tekuće takmičarske godine.

Član 66.

U namjeri da se zaštiti integritet takmičenja u odnosu na igrače amatere u odnosima raskida ugovora i pristupa novom klubu, primjenjivat će se odredbe kao i za profesionalne igrače. Članstvo u klubu i amaterski ugovor ne može se jednostrano raskinuti u toku takmičenja.

Član 67.

Igrač koji je registrovan kao profesionalni igrač, a želi da igra nogomet/fudbal kao amater, može biti registrovan kao amater samo u registracionom periodu i to po isteku najmanje 30 (trideset) dana od zadnjeg nastupa za klub kao igrač profesionalac.

2. Profesionalni igrači

Član 68.

Profesionalni igrač je igrač koji ima pismeni ugovor sa klubom, a koji se bavi nogometom/fudbalom kao svojim zanimanjem za platu i druge ugovorom utvrđene naknade.

Za igrače profesionalce klub je dužan da uplaćuje doprinose, koji se plaćaju na plate iz radnog odnosa, posebno doprinose za penziona - invalidsko osiguranje, a kad omogući pravni sistem države BiH, odnosno entiteta, klub i igrač mogu se sporazumjeti da se ovo pitanje riješi ugovorom.

Ako klub ne uplaćuje doprinose za penziona-invalidsko osiguranje igrača sa profesionalnim ugovorom, ili ne osigura igrača za slučajevne povreda, za period više od 3 (tri) mjeseca, to je opravdani razlog za raskid ugovora.

3. Zaključivanje ugovora sa profesionalnim igračima

Član 69.

Sa igračem koji je odabrao igranje nogometa/fudbala kao svoju profesiju obavezno se zaključuju ugovori o radu koji sadrže obavezne elemente propisane državnim, odnosno entitetskim propisima te propisima NS/FS BiH i FIFA Pravilnika o statusu i transferu igrača.

Član 70.

Minimalna dužina ugovora je 6 (šest) mjeseci, dok je maksimalna dužina trajanja ugovora 5 (pet) godina.

Igrači mlađi od 18 (osamnaest) godina ne smiju potpisivati profesionalne ugovore koji traju duže od tri godine. Bilo koja klauzula koja se odnosi na duže trajanje ugovora neće biti priznata.

Klub koji namjerava zaključiti ugovor sa profesionalnim igračem o tome mora obavijestiti igračev aktuelni klub pismenim putem prije stupanja u pregovore sa profesionalnim igračem.

Profesionalni igrač može zaključiti ugovor sa nekim drugim klubom samo ako je njegov ugovor sa aktuelnim klubom istekao ili ističe u roku od narednih šest mjeseci. Svako kršenje ove odredbe biće kažnjeno odgovarajućim sankcijama Disciplinskog pravilnika.

Član 71.

Ugovor potpisuju igrač i predstavnik kluba.

Sve vrste ugovora se potpisuju u sjedištu nadležnog registracionog saveza.

Ugovor igrača koji nije navršio 18 (osamnaest) godina života na dan potpisivanja ugovora potpisuje pored igrača i roditelj ili staratelj igrača.

Ugovor se ovjerava pečatom kluba, a zaključuje se u tri primjerka.

Član 72.

Sekretarijat NS/FS BiH vodi registar svih profesionalnih ugovora.

Član 73.

Potpis stavljen na ugovor ne može se jednostrano povući.

Ugovor stupa na snagu danom kako su to ugovorne strane utvrdile, a ako isti nedostaje, ugovor stupa na snagu danom verifikacije u nadležnom registracionom Savezu. Isti rokovi važe

i za slučaj ostvarivanja prava po osnovu ugovora kod nadležnog saveza.

Član 74.

Ugovorom između igrača i kluba kao i aneksom ugovora utvrđuju se međusobni odnosi, obaveze kluba prema igraču, obaveze igrača prema klubu i druge odredbe koje su dogovorene između kluba i igrača.

Član 75.

Zaključivanje ugovora i vrijeme trajanja ugovora upisuje se u legitimaciju i pasoš igrača.

Član 76.

Ukoliko ugovor ističe na kraju takmičarske sezone ili polusezone, smatra se da ugovor ističe narednog dana od dana posljednje odigrane utakmice stalnih takmičenja, sezone ili polusezone.

Član 77.

Ako je u pregovaranje o ugovoru uključen posrednik igrača njegovo ime mora biti navedeno u ugovoru.

Član 78.

Odredbe u ugovoru koje su suprotne odredbama ovog Pravilnika i FIFA Pravilnika o statusu i transferu igrača smatraju se ništavim.

4. Verifikacija ugovora

Član 79.

Verifikaciju ugovora i aneksa ugovora, sporazuma o ustupanju igrača te sporazumnih raskida i produženja ugovora igrača klubova Premijer lige, vrši NS/FS BiH, a ostale verifikuju nadležni registracioni savezi.

Po unosu ugovora u COMET informacioni sistem od strane nadležnog registracionog saveza, Odjel za pravne poslove NS/FS BiH provjerava usklađenost ugovora sa pravnim aktima NS/FS BiH i relevantnim državnim propisima, te isti verifikuje elektronskim putem u COMET-u.

Verifikacija ugovora vrši se u svrhu provođenja kontrole nad radom klubova, te zaštite igrača.

Ukoliko postoje smetnje za verifikaciju NS/FS BiH o tome neodložno, a najkasnije u roku od 5 (pet) dana, obavještava nadležni registracioni savez i klub, koji su dužni da otklone nedostatke pod prijetnjom sankcije koja je predviđena Disciplinskim pravilnikom NS/FS BiH, a koja će se klubu izreći zbog nepoštivanja odredbi državnih, NS/FS BiH te FIFA propisa.

Nije potrebno dostavljanje originalnih primjeraka ugovora/sporazuma/aneksa u NS/FS BiH.

5. Prekid (prestanak) aktivnosti

Član 80.

Profesionalni igrači koji po isteku svojih ugovora završavaju karijeru, te amateri koji prestaju da se bave nogometnom/fudbalskom aktivnosti, ostaće registrovani članovi NS/FS BiH na period od 30 (trideset) mjeseci u slučaju da je njihov zadnji klub registrovan u NS/FS BiH.

Ovaj period počinje teći od dana kada je igrač imao svoj zadnji nastup za klub na službenoj utakmici.

6. Vraćanje amaterskog statusa

Član 81.

Igrač registrovan kao profesionalac ne može se preregistrovati kao amater sve dok ne protekne najmanje 30 (trideset) dana od njegove posljednje utakmice kao profesionalnog igrača.

Nije obavezno isplaćivanje nikakvog obeštećenja nakon vraćanja amaterskog statusa. Ukoliko se igrač preregistruje kao profesionalac u roku od 30 (trideset) mjeseci od vraćanja amaterskog statusa, njegov novi klub dužan je platiti obeštećenje za treniranje.

X ODRŽAVANJE UGOVORNE STABILNOSTI IZMEĐU PROFESIONALNIH IGRAČA I KLUBOVA

1. Poštivanje ugovora

Član 82.

Ukoliko igrači sa klubovima potpišu profesionalni ili amaterski ugovor, a potom aneks predmetnog ugovora, obaveza kluba je da nadležnom registracionom organu dostavi primjerak potpisanog aneksa ugovora u roku od 5 (pet) dana od dana potpisa istog.

Nadležni organ NS/FS BiH će uzimati u obzir i one izmjene i dopune ugovora ili sporazume koji nisu uredno dostavljeni, uz pokretanje disciplinskog postupka protiv kluba zbog nepoštivanja obaveze iz stava 1. ovog člana.

Sporazum zaključen između igrača i kluba, a koji proističe iz ranije potpisanog ugovora između igrača i kluba, organi NS/FS BiH će smatrati očitovanjem volja dviju strana usmjerenim na proizvođenje pravom dopuštenih pravnih učinaka koji se sastoje u nastanku, prestanku ili promjeni pravnih odnosa i iste će prihvatati i tretirati kao i ugovore potpisane između igrača i klubova.

Ugovor između profesionalnog igrača i kluba prestaje po isteku vremena na koji je ugovor zaključen ili uz obostranu saglasnost.

Ugovor može raskinuti bilo koja strana bez posljedica bilo koje vrste (bilo plaćanja obeštećenja ili izricanja sportskih sankcija) iz opravdanih razloga, ili opravdanih sportskih razloga.

Ugovor ne može biti jednostrano raskinut bez opravdanog razloga u toku takmičarske godine, a što će nadležni organ cijiniti u svakom konkretnom slučaju.

Član 83.

Igraču profesionalcu, koji zbog povrede ne igra, ne može se jednostrano raskinuti ugovor sve dok traje medicinska rehabilitacija. Takav igrač ostaje član kluba, a sve do isteka ugovora ima pravo na platu kao i na sva druga prava po osnovu ugovornog odnosa.

Član 84.

Igrač profesionalac koji odbija rehabilitaciju ili redovne treninge, nema prava iz prethodnog člana.

Teret dokazivanja da igrač odbija rehabilitaciju ili redovne treninge je na klubu.

2. Zaštićeno razdoblje

Član 85.

Ne može se raskinuti ugovor igraču koji je proveo u klubu tri cjelokupne takmičarske godine ili tri sezone, u zavisnosti šta prvo nastupi, nakon zaključenja ugovora između kluba i igrača, ako je ugovor zaključen prije 28. rođendana igrača profesionalca, odnosno razdoblje od

dvije cjelokupne takmičarske godine ili dvije sezone, u zavisnosti šta prvo nastupi, nakon zaključenja ugovora između kluba i igrača, ako je takav ugovor zaključen nakon 28. rođendana profesionalca. Prethodno pomenuti periodi smatraju se zaštićenim razdobljem.

Izuzetno, ugovor u smislu ovog člana može se raskinuti ako igrač odbija da izvršava ugovorne obaveze, odnosno odbija da trenira ili igra bez opravdanog razloga, što je klub dužan dokazati.

Član 86.

Igrač sa profesionalnim ugovorom, koji je mlađi od 18 (osamnaest) godina, može raskinuti ugovor prije isteka roka ako se registruje za inostrani klub, a mijenja mjesto boravka zbog preseljenja porodice.

3. Sporazumni raskid ugovora

Član 87.

Sporazumni raskid ugovora može se vršiti tokom takmičarske godine, a registracija igrača po ovom osnovu vrši se u registracionim periodima.

Kod sporazumnog raskida profesionalnog ugovora, ugovorne strane pismeno utvrđuju međusobna prava i obaveze koja su proistekla iz raskinutog ugovora.

4. Raskid ugovora iz opravdanih razloga

Član 88.

Raskid ugovora iz opravdanih razloga, ukoliko igrač i klub ne mogu postići dogovor, odobravaju komisije za status igrača nadležnog registracionog saveza u prvom stepenu, odnosno po žalbi, u drugom stepenu, Komitet za status igrača NS/FS BiH za igrače klubova Premijer lige, dok komisije za status igrača entitetskih saveza odobravaju raskid ugovora iz opravdanih razloga za ostale igrače.

Ugovor može raskinuti bilo koja ugovorna strana bez posljedica bilo koje vrste (plaćanje obeštećenja i izricanje sportskih sankcija), kada to čini na osnovu opravdanog razloga.

Član 89.

Opravdani razlozi za raskid ugovora mogu biti odbijanje treniranja, odbijanje rehabilitacije, neodazivanje pozivu za odigravanje utakmica, neisploćivanje plate, neplaćanje doprinosa za penziona – invalidsko osiguranje, kao i druge povrede radnih obaveza koje se učestalo i nakon pismenih opomena ponavljaju. Opravdanost razloga za raskid ugovora cijenit će se od slučaja do slučaja, na zahtjev igrača, odnosno kluba.

Član 90.

Raskid ugovora iz opravdanih razloga, na zahtjev igrača ili kluba, ne isključuje pravo kluba da traži naknadu za treniranje, u skladu sa ovim Pravilnikom, ili odlukom Izvršnog odbora i povrat iznosa koje je igrač primio kod potpisa ugovora srazmjerno vremenu koji je preostao do isteka ugovora. Ovo se ne odnosi na plate i premije koje je igrač primao.

Član 91.

Ugovor može raskinuti bilo koja strana bez posljedica bilo koje vrste (plaćanje obeštećenja i izricanje sportskih sankcija), kada to čini na osnovu opravdanog razloga.

5. Posljedice raskida ugovora bez opravdanog razloga

Član 92.

Strana koja krši ugovor dužna je platiti odštetu drugoj strani.

U skladu sa odredbama poglavlja XII i XIII te Dodatka 3 ovog Pravilnika, a vezano za obeštećenje za treniranje, te osim ako ugovorom, aneksom ugovora ili sporazumom nije drugačije predviđeno, odšteta za raskid ugovora obračunavaće se uzimajući u obzir državne propise, odnosno propise entiteta, specifičnost sporta, te sve druge objektivne kriterije.

Kriteriji iz prethodnog stava posebno uključuju platu i druge beneficije koje se duguju igraču prema postojećem ugovoru i/ili novom ugovoru, sporazumu i sl., preostalo vrijeme trajanja ugovora a najviše do pet godina, honorare i troškove koje je platio ili imao prethodni klub (amortizovane tokom trajanja ugovora) kao i da li to kršenje ugovora pada u zaštićenom periodu.

Pravo na odštetu ne može se prenositi na treću stranu.

Ako se od profesionalnog igrača traži da plati odštetu, taj profesionalni igrač i njegov novi klub će biti solidarno i pojedinačno odgovorni za njeno plaćanje. Iznos se može definisati ugovorom ili sporazumom između strana.

Pored obaveze plaćanja odštete, biće izrečene i sportske sankcije igraču za kojeg se utvrdi da je raskinuo ugovor tokom zaštićenog perioda.

Sportske sankcije iz prethodnog stava izricat će se na način kako je utvrđeno u odredbama Disciplinskog pravilnika NS/FS BiH.

Disciplinske mjere mogu biti izrečene i izvan zaštićenog perioda zbog nepravovremenog obavještanja o raskidu ugovora u roku od 15 (petnaest) dana od zadnje utakmice u sezoni (uključujući državne kupove) kluba za koji je igrač registrovan.

Zaštićeni period ponovo počinje teći kada prilikom obnavljanja ugovora bude produženo trajanje prethodnog ugovora.

Pretpostavlja se, osim ako se utvrdi suprotno, da je bilo koji klub koji potpiše ugovor sa profesionalnim igračem koji je svoj ugovor raskinuo bez opravdanog razloga, naveo tog profesionalca da prekrši ugovor. Takvom klubu će biti zabranjeno da registruje bilo kojeg novog igrača, bilo u državi ili međunarodno, za dva registracijska perioda.

Biće sankcionisana svaka osoba koja je dužna poštovati Statut i propise NS/FS BiH (službena lica kluba, posrednici igrača, igrači, itd.) koja se ponaša na način kojim navodi na raskid ugovora između igrača profesionalca i kluba u cilju olakšavanja transfera igrača.

6. Raskid ugovora iz sportski opravdanih razloga

Član 93.

Igrač profesionalac koji je tokom sezone nastupao na manje od 10% službenih utakmica koji je izveo njegov klub može prijevremeno raskinuti ugovor na osnovu sportski opravdanog razloga. Prilikom ocjenjivanja takvog slučaja, treba pažljivo razmotriti igračevu situaciju.

Postojanje sportski opravdanog razloga se utvrđuje od slučaja do slučaja. U takvom slučaju ne izriču se sportske sankcije, iako se može izreći plaćanje obeštećenja, a klub ima pravo tražiti da mu igrač vrati ugovorene iznose koje je primio srazmjerno vremenu koje je raskinuo ugovor prije isteka.

Profesionalni igrač može raskinuti svoj ugovor po ovom osnovu samo tokom 15 (petnaest) dana nakon posljednje službene utakmice u određenoj sezoni.

Raskid ugovora iz sportski opravdanih razloga mogu tražiti igrač i klub.

Član 94.

Ukoliko se igrač i klub ne mogu dogovoriti, raskid ugovora iz sportski opravdanih razloga odobravaju komisije za status igrača nadležnih registracionih saveza u prvom stepenu, odnosno po žalbi, u drugom stepenu, Komitet za status igrača NS/FS BiH za igrače klubova Premijer lige, a komisije za status igrača entitetskih saveza za ostale igrače.

Član 95.

Ako je ugovor raskinut na zahtjev kluba ili igrača iz sportski opravdanih razloga, klub/igrač je obavezan da prema klubu/igraču ispuni obaveze koje je preuzeo ugovorom srazmjerno do dana raskida ugovora, odnosno igrač je dužan da vrati klubu iznose koje je primio za ugovoreni rok, srazmjerno vremenu koje je preostalo do isteka ugovora. Prednje navedeno se ne odnosi na plate i premije.

Izuzetno, u slučaju kada je ugovor raskinut iz razloga što igrač odbija da trenira, neće važiti odredba iz prethodnog stava.

Raskid ugovora po ovom osnovu ne isključuje pravo kluba na naknadu za treniranje.

Član 96.

Raskid profesionalnog ugovora klub ne može tražiti dok je igrač povrijeđen. Utvrđivanje okolnosti da li igrač može igrati, odnosno trenirati u vezi ostvarivanja prava iz ovog Pravilnika utvrđuje ljekar kluba, ili druga nadležna medicinska ustanova, na zahtjev kluba.

Član 97.

Raskid ugovora iz sportski opravdanih razloga na zahtjev igrača isključuje izricanje sportskih sankcija, ali ne isključuje pravo kluba na naknade za treniranje kod narednih transfera, u skladu sa odredbama ovog Pravilnika.

Raskid ugovora po osnovu sportski opravdanih razloga igrač može tražiti samo u roku od 15 (petnaest) dana nakon posljednje zvanične utakmice koji je klub odigrao u takmičarskoj sezoni, odnosno u pauzi sezone.

Igrač kome je raskinut ugovor iz opravdanih razloga, kao i iz sportski opravdanih razloga, može za drugi klub biti registrovan samo u registracionom periodu.

7. Jednostrani raskid ugovora

Član 98.

U slučaju da klub jednostrano raskine ugovor bez opravdanog razloga, ili bez sportski opravdanog razloga, dužan je prema igraču ispuniti sve ugovorne obaveze do kraja isteka ugovora.

U ovaj iznos uključene su plate i druga ugovorna davanja koja bi igrač imao da je ostao član kluba.

Klub koji je isplatio igraču obeštećenje za jednostrani raskid ugovora ima pravo na naknadu za treniranje igrača, ukoliko igrač potpiše profesionalni ugovor sa drugim klubom. Pored obaveze plaćanja odštete, biće izrečene i sportske sankcije svakom klubu za koji se utvrdi da je raskinuo ugovor ili navodio igrača da raskine ugovor tokom zaštićenog perioda.

Jednostrani raskid bez opravdanog razloga ili bez sportski opravdanog razloga nakon zaštićenog perioda neće dovesti do sportskih sankcija.

Član 99.

U slučaju da igrač jednostrano raskine ugovor obavezan je klubu vratiti, odnosno isplatiti iznos naknade koji je primio prilikom zaključenja ugovora. Takav igrač ne može promijeniti klub dok mu ne istekne predmetni ugovor.

Član 100.

Kod jednostranog raskida ugovora od strane igrača, klub ima pravo na naknadu i obeštećenja u skladu sa ovim Pravilnikom ili u skladu sa odlukom Izvršnog odbora NS/FS BiH, koja je regulisana odlukom Izvršnog odbora, kao i u skladu sa ugovorom zaključenim između igrača i kluba, ako je ovo pitanje regulisano ugovorom.

8. Posebne odredbe u vezi sa ugovorom između profesionalnog igrača i kluba

Član 101.

Klub koji namjerava zaključiti ugovor sa profesionalnim igračem mora o tome obavijestiti njegov trenutni klub u pismenoj formi prije početka pregovora sa profesionalnim igračem.

Igrač može da zaključi ugovor sa drugim klubom samo ako je njegov ugovor sa sadašnjim klubom istekao, ili je ugovor između igrača i prethodnog kluba raskinut iz opravdanih razloga, ili sportski opravdanih razloga.

Izuzetno od prethodnog stava, igrač može da zaključi ugovor sa drugim klubom i šest mjeseci prije isteka važećeg ugovora sa prethodnim klubom, s tim što se takav ugovor ne može verifikovati prije isteka ili raskida važećeg ugovora po bilo kojem osnovu, ili prije dobijanja ITC-a za igrače koji dolaze iz inostranstva.

Klubovi mogu sa profesionalnim igračima u ugovoru utvrditi naknade i obeštećenje za raskide ugovora po raznim osnovima.

9. Dospjele novčane obaveze kluba

Član 102.

Klubovi moraju ispunjavati svoje novčane obaveze prema igračima i drugim klubovima u skladu sa uslovima utvrđenim u ugovorima, aneksima ili sporazumima potpisanim s igračima i klubovima, kao i novčane obaveze nastale na osnovu ugovora o transferima.

Da bi se smatralo da klub ima dospjelih obaveza u smislu ovog člana, povjerilac (igrač ili klub) mora pismenim putem upozoriti dužnika (klub) o neplaćanju i dati mu rok od najmanje 10 (deset) dana u kojem klub treba ispuniti svoju/e novčanu/e obvezu/e.

Svaki klub za kojeg se utvrdi da je zakasnio s plaćanjem dospjele obaveze više od 30 (trideset) dana bez prima facie ugovorne osnove, bit će kažnjen u skladu sa Disciplinskim pravilnikom NS/FS BiH.

XI UTICAJ TREĆE STRANE NA KLUBOVE I VLASNIŠTVO TREĆE STRANE NAD IGRAČEVIM PRAVIMA

Član 103.

Nijedan klub ne smije potpisati ugovor koji omogućava drugoj strani potpisnici tog ugovora ili nekoj trećoj strani da utiče na njegovu nezavisnost u pogledu pitanja koja se odnose na zapošljavanje i transfere, njegove politike ili performanse njegovih timova.

Nijedan klub niti igrač ne mogu zaključiti ugovor s trećom stranom prema kojem treća strana ima pravo učestvovati, potpuno ili djelimično, u naknadi koja je vezana s budućim transferom igrača iz jednog u drugi klub, ili su joj dodijeljena bilo kakva prava povezana s budućim transferom ili naknadom za transfer.

Disciplinska komisija NS/FS BiH može izreći disciplinske sankcije klubovima i igračima koji se ne pridržavaju obaveza iz ovog člana.

XII NAKNADA ZA TRENIRANJE IGRAČA

Član 104.

Naknada za treniranje igrača isplatiće se klubu, odnosno klubovima kod kojih je igrač bio registrovan kao amater pri potpisu prvog profesionalnog ugovora i to na ime troškova treniranja koje su klubovi imali od 12. pa do navršene 21. godine života igrača, kada se smatra da je igrač završio treniranje i to srazmjerno vremenu provedenom u klubu, odnosno u klubovima do 21. godine života.

Član 105.

Kada igrač potpisuje naredne profesionalne ugovore, naknada za treniranje se isplaćuje prethodnom klubu.

Član 106.

U skladu sa ciljevima naknade za treniranje i naknade troškova za treniranje i razvoj igrača koji su klub, odnosno klubovi imali za razvoj igrača, a pošto su doprinosi klubova bili različiti, ovim Pravilnikom se utvrđuju sljedeći kriteriji za izračunavanje naknade za treniranje igrača, kod potpisa prvog profesionalnog ugovora, kako slijedi:

1. Svi igrači u klubu se razvrstavaju u tri kategorije i to:

- igrači od navršene 12 do navršene 15 godine života,
- igrači od navršene 15 do navršene 18 godine života,
- igrači od navršene 18 godina do navršene 21 godine života.

Član 107.

U skladu sa kategorizacijom FIFA-e, klubovi iz BiH u međunarodnim transferima igrača svrstani su u slijedeće kategorije:

1. treća kategorija: klubovi Premijer lige BiH;
2. četvrta kategorija: ostali klubovi

U transferu igrača u BiH klubovi se svrstavaju u slijedeće kategorije:

1. prva kategorija: klubovi Premijer lige BiH,
2. druga kategorija: klubovi Prve lige NS F BiH i Prve lige FS RS,
3. treća kategorija: klubovi druge lige,
4. četvrta kategorija: ostali klubovi.

Član 108.

Izvršni odbor NS/FS BiH određuje naknade za treniranje po osnovu godina života i po osnovu kategorije kluba, a u skladu sa odredbama ovog Pravilnika.

Naknada u smislu ovog Pravilnika se izračunava na godinu dana i pola godine.

Član 109.

Izvršni odbor NS/FS BiH, u odluci o visini naknade, a u smislu odredbi ovog Pravilnika, utvrđuje naknadu u rasponima po pojedinim elementima iz Pravilnika.

Pravo na naknadu u prvom stepenu utvrđuje nadležni organ registracionog saveza kluba u koji je igrač prešao, a u drugom stepenu Komisija za status igrača NS/FS BiH - za igrače klubova Premijer lige, a komisije za status igrača entitetskih saveza za igrače klubova nižeg stepena takmičenja.

Član 110.

Visina naknade utvrđena u skladu sa ovim Pravilnikom uvećava se za procenat utvrđen odlukom Izvršnog odbora za igrače koji su nastupali u reprezentativnim selekcijama NS/FS BiH.

Novi klub plaća utvrđeni iznos najkasnije u roku od 30 (trideset) dana od igračeve registracije.

Član 111.

Zahtjev za naknadu za treniranje, klub podnosi u roku od 30 (trideset) dana od saznanja da je potpisan prvi profesionalni ugovor, a najkasnije u roku od 2 (dvije) godine od dana

potpisanog ugovora

Član 112.

Ukoliko je nemoguće utvrditi vezu između igrača i bilo kojeg od klubova koji su ga trenirali ili ukoliko se ti klubovi ne jave u roku od dvije godine od dana registracije igrača za klub koji je u obvezi isplatiti solidarni doprinos, naknada se plaća savezu (savezima) kluba (klubova) u kojem (kojima) je igrač bio treniran.

Savez (savezi) ima pravo predmetnu naknadu potraživati u roku od 6 (šest) mjeseci nakon proteka roka od dvije godine od dana registracije igrača.

Član 113.

Kada je igrač amater prešao u drugi klub bez da je promijenio status, njegov bivši klub nema pravo na naknadu.

Ukoliko igrač amater do kraja takmičarske godine u kojoj navršava 23 (dvadeset i tri) godine života stekne profesionalni status, klubovi u kojima je taj igrač bio ranije registrovan, imaju pravo na naknadu za treniranje i razvoj tog igrača od novog kluba za razdoblje od početka takmičarske godine u kojoj je igrač navršio 12 (dvanaest) godina života pa do završetka takmičarske godine u kojoj je igrač navršio 21 (dvadeset i jednu) godinu života.

Naknada se plaća ukoliko je amaterski ugovor zaključen najkasnije do kraja takmičarske godine u kojoj igrač navršava 23 (dvadeset i tri) godine života.

Ukoliko igrač profesionalac stekne amaterski status, naknada za treniranje i razvoj se ne plaća.

U slučaju da se igrač ponovno registruje kao profesionalac u roku od 30 (trideset) mjeseci od ponovnog sticanja amaterskog statusa, njegov novi klub plaća naknadu za treniranje i razvoj u skladu sa odredbama ovog Pravilnika.

Izuzetno, na naknadu za treniranje i razvoj nema pravo onaj klub koji jednostranom izjavom bez opravdanog razloga raskine ugovor s igračem ili ako je nadležno tijelo za rješavanje sporova raskinulo ugovor na štetu kluba.

Neplaćanje naknade za razvoj i treniranje igrača koji prelazi iz kluba u klub, ne utiče na pravo igrača da pristupi drugom klubu i da se za njega registruje po odredbama ovog Pravilnika.

XIII MEHANIZAM SOLIDARNOSTI

1. Solidarni doprinos

Član 114.

Ukoliko igrač profesionalac izvrši transfer u toku trajanja ugovora, iznos od 5% bilo koje naknade, izuzimajući naknadu za treniranje plaćene predhodnom klubu, odbiće se od ukupnog iznosa ove naknade i novi klub će ga preraspodijeliti, kao solidarni doprinos klubu/klubovima koji su godinama bili uključeni u treniranje i obrazovanje igrača. Ovaj doprinos solidarnosti će odražavati broj godina (izračunato proporcionalno ako se radi o manje od jedne godine) u kojima je bio registrovan kod relevantnog kluba/klubova, između sezona svog 12. i 21. rođendana, prema kategorizaciji FIFA-e.

Iznos po osnovu solidarnosti se isplaćuje neovisno od isplata naknada za treniranje, a obaveza traje tokom svih ugovora koje igrač potpisuje.

Klubu kojem se isplaćuje naknada, odnosno obeštećenje, ne isplaćuje se iznos po osnovu solidarnosti.

Posebne odredbe vezane za obračunavanje solidarnog doprinosa detaljno su navedene u odredbama Dodatka 3 ovog Pravilnika.

XIV RJEŠAVANJE SPOROVA

1. Sporovi u vezi sa registracijom igrača

Član 115.

Protiv svake registracije može se izjaviti pismeni prigovor nadležnom savezu za registraciju.

Prigovor mogu izjaviti svi članovi i sve organizacije NS/FS BiH. Prigovor ne utiče na pravo nastupa igrača sve do donošenja pravosnažne odluke od strane nadležnog organa.

Ukoliko prigovor nije podnesen u blagovremenom roku, ili ukoliko je prigovor odbijen, registracija ostaje na snazi.

Član 116.

Rok za izjavu prigovora je 8 (osam) dana, računajući od dana objave registracije u odgovarajućem službenom glasniku.

Uz prigovor se dostavlja i dokaz o uplati takse.

Pri ocjeni blagovremenosti prigovora u obzir se uzima datum preporučenog pisma – poštanskog žiga, ili dan neposrednog uručenja.

Član 117.

Registracioni organ dužan je odluku o prigovoru donijeti u roku od 8 (osam) dana po prijemu žalbe. Odluka po prigovoru dostavlja se zainteresovanim stranama u pismenoj formi sa obrazloženjem.

Ukoliko registracioni organ ne postupi u smislu predhodnog stava smatrat će se da je prigovor odbijen.

Član 118.

Na odluku donesenu po prigovoru na registraciju, ili ako odluka u prvom stepenu nije donesena u propisanom roku, nezadovoljna strana ima pravo uložiti žalbu drugostepenom organu u roku od 15 (petnaest) dana od prijema odluke donesene po prigovoru, odnosno od dana kada je trebala biti donesena odluka prvostepenog organa.

Za igrače profesionalce, kao i za igrače amatere za sporove po registracijama kao drugostepeni organ nadležna je Komisija za status i transfer igrača entiteta, a ako se radi o spornom odnosu po registraciji klubova iz različitih entiteta kao drugostepeni organ nadležn je Komitet za status i transfer igrača NS/FS BiH.

Uz žalbu se uplaćuje taksa.

Drugostepeni organ po žalbi odluku donosi u roku od 30 (trideset) dana od dana prijema žalbe.

Član 119.

Registracija će biti poništena ili ispravljena kada registracioni organ utvrdi da je žalba osnovana.

Registracija će biti poništena ako se na osnovu priloženih dokumenata utvrdi da igrač nije ispunjavao uslove za registraciju, a igrač će ostati član dosadašnjeg kluba sa pravom nastupa koje je imao u tom klubu.

Registracija će biti ispravljena ako se utvrdi da igrač ispunjava uslove za provođenje registracije, ali da nije primijenjen odgovarajući član ovog Pravilnika, a igrač će imati pravo nastupa po izvršenoj registraciji.

Odluka o poništenju, odnosno ispravci registracije objavljuje se u službenom glasniku nadležnog saveza.

Član 120.

Ako dva ili više klubova podnesu dokumentaciju za registraciju istog igrača, registracioni organ će izvršiti registraciju igrača za onaj klub za koji je igrač vremenski prije potpisao prijavu, a pravo nastupa teče od dana objave registracije.

Član 121.

Ukoliko je igrač potpisao prijavu za dva ili više klubova protiv igrača i kluba za koji je potpisao naknadnu prijavu biće preduzete disciplinske mjere prema odredbama Disciplinskog pravilnika NS/FS BiH.

2. Sporovi u vezi sa ugovorima

Član 122.

Sporovi koji nastaju u vezi sa ugovorima, za profesionalne igrače i igrače amatere Premijer lige, na zahtjev ugovornih strana u prvom stepenu rješava Komisija za status i transfer igrača registracionog Saveza, a po žalbi u drugom stepenu rješava Komitet za status i transfer igrača NS/FS BiH.

Sporove ostalih igrača amatera u prvom stepenu rješava nadležni organ registracionog Saveza, a u drugom stepenu po žalbi, Komisija za status i transfer igrača entitetskog Saveza.

Nadležni organi NS/FS BiH neće rješavati sporove ako su prošle više od 2 (dvije) godine od događaja koji je doveo do spora. U svakom pojedinačnom slučaju bit će ispitano da li je taj rok istekao.

Na odluku prvostepenog organa, nezadovoljna stranka može uložiti žalbu drugostepenom organu u roku od 8 (osam) dana od dana prijema prvostepene odluke.

Prvostepena odluka postaje pravosnažna ukoliko po isteku žalbenog roka nijedna od strana u sporu nije uložila žalbu na prvostepenu odluku ili ako su se stranke pismeno odrekle prava na žalbu.

Član 123.

Ukoliko prvostepeni organ nije donio odluku po zahtjevu stranke u roku od 30 (trideset) dana po prijemu zahtjeva, nezadovoljna strana može izjaviti žalbu drugostepenom organu u roku od narednih 8 (osam) dana, računajući od dana kad je trebalo biti odlučeno po podnesenoj žalbi.

Drugostepeni organ je dužan donijeti odluku po žalbi u roku do 30 (trideset) dana od dana podnošenja žalbe.

Prvostepena odluka se smatra pravosnažnom protekom roka za žalbu ili ukoliko su se stranke u sporu pismeno odrekle žalbe.

Odluke drugostepenog organa su konačne te protiv istih nije dopuštena žalba. Nezadovoljna strana može protiv drugostepene odluke podnijeti vanredni pravni lijek – pokretanje postupka pred Međunarodnim arbitražnim sudom za sport u Lozani (CAS).

3. Rješavanje sporova po osnovu zahtjeva za treniranje igrača

Član 124.

Sporove u vezi naknade za treniranje igrača profesionalaca klubova Premijer lige BiH, rješava u prvom stepenu Komisija za status i transfer igrača nadležnog registracionog saveza, a u drugom stepenu po žalbama rješava Komitet za status i transfer igrača NS/FS BiH.

Sporove u vezi naknade za treniranje igrača koji se registruju za klubove ostalih stepena takmičenja u prvom stepenu rješava nadležni organ saveza za registraciju kluba u koji je igrač prešao, a u drugom stepenu komisije za status igrača entitetskih saveza.

Član 125.

Zahtjevi u prvom stepenu se rješavaju u roku od 30 (trideset) dana od dana prijema zahtjeva.

Član 126.

Na odluku prvostepenog organa nezadovoljna strana može uložiti žalbu drugostepenom organu u roku od 15 (petnaest) dana od dana prijema prvostepene odluke.

Žalbe u drugom stepenu se rješavaju u roku od 30 (trideset) dana od dana prijema žalbe.

Odluke drugostepenog organa su konačne te protiv istih nije dopuštena žalba. Nezadovoljna strana može protiv drugostepene odluke podnijeti vanredni pravni lijek – pokretanje postupka pred Međunarodnim arbitražnim sudom za sport u Lozani (CAS).

4. Sporovi igrača i posrednika igrača

Član 127.

Sporove između igrača i posrednika igrača u prvom stepenu rješava Komitet za status igrača NS/FS BiH, u roku od 30 (trideset) dana od dana prijema zahtjeva.

Na odluku prvostepenog organa nezadovoljna strana može uložiti žalbu Apelacionoj komisiji NS/FS BiH, u roku od 15 (petnaest) dana od dana prijema odluke.

Apelaciona komisija rješava žalbu u roku od 30 (trideset) dana od dana prijema žalbe.

Odluke drugostepenog organa su konačne te protiv istih nije dopuštena žalba. Nezadovoljna strana može protiv drugostepene odluke podnijeti vanredni pravni lijek – pokretanje postupka pred Međunarodnim arbitražnim sudom za sport u Lozani (CAS).

XV ZAHTJEV ZA ZAŠTITU ZAKONITOSTI PRIMJENE PRAVILNIKA

Član 128.

Na sve vrste sporova u kojima se pojavljuju profesionalni igrač i klub, kao i posrednik igrača koji su završeni u prvostepenom i drugostepenom postupku (odluke postale pravosnažne) nezadovoljna stranka može putem Pravnog komiteta NS/FS BiH podnijeti zahtjev Izvršnom odboru NS/FS BiH za zaštitu zakonitosti u primjeni ovog Pravilnika i drugih akata Saveza i akata nogometnih/fudbalskih Saveza Entiteta. Zahtjev se podnosi u roku od 30 dana po prijemu drugostepene odluke. Neblagovremeni Zahtjev će se odbaciti.

Zahtjev za zaštitu zakonitosti u primjeni Pravilnika kao i drugih akata Saveza ne može se podnositi gdje se kao igrač pojavljuje amater.

XVI ODREDBE O FUTSALU

Član 129.

Ako ovim Pravilnikom ili FIFA Pravilnikom o status i transferu igrača nije drugačije određeno za pojedine odnose, odredbe ovog Pravilnika primjenjuju se na klubove i igrače za futsal.

Član 130.

Igrač futsala može biti registrovan kao amater ili kao profesionalac i na istog se primjenjuju odredbe ovog Pravilnika koji se odnose na profesionalce i amatere.

Član 131.

Za igrače futsala ne primjenjuju se odredbe ovog Pravilnika koje se odnose na registracione periode, pravo na naknadu za treniranje igrača, kao i pravo na doprinos solidarnosti. IO NS/FS BiH će posebno utvrditi prelazne rokove za ovu kategoriju igrača.

Član 132.

Igrač registrovan za nogomet/fudbal može biti registrovan i za klub u futsalu.

XVII ODREDBE O ŽENSKOM NOGOMETU/FUDBALU

Član 133.

Ako ovim Pravilnikom ili FIFA Pravilnikom o status i transferu igrača nije drugačije određeno za pojedine odnose, odredbe ovog Pravilnika primjenjuju se na klubove i igrače za ženski nogomet/fudbal.

Član 134.

Odredbe ovog Pravilnika o naknadi za treniranje ne primjenjuju se na ženski nogomet/fudbal.

Izvršni odbor NS/FS BiH može svojom odlukom utvrditi posebne uslove u vezi naknade za treniranje igrača u ženskom nogometu/fudbalu.

XVIII PUŠTANJE IGRAČA ZA REPREZENTATIVNE EKIPE

Član 135.

Klubovi su obavezni puštati svoje registrovane igrače da nastupaju za reprezentativne ekipe, a u skladu sa Aneksom 1 FIFA Pravilnika o statusu i transferu igrača.

XIX TAKSE

Član 136.

Za sve vrste sporova koji rješavaju organi saveza moraju se uplatiti takse. Uz zahtjev za rješavanje spora mora se priložiti i dokaz o plaćenju taksi u visini koja je utvrđena odlukom Izvršnog odbora NS/FS BiH.

Ako taksa nije plaćena podnosilac zahtjeva će se pozvati da istu uplati u roku od 24 sata.

Ukoliko u roku propisanom prethodnim stavom podnosilac zahtjeva ne uplati taksu, zahtjev će se odbaciti rješenjem.

Visinu naknade za registraciju igrača, članarine za igrače, trenere, sudije i kontrolore suđenja i dr., kao i visinu taksi za žalbe i zahtjeve za rješavanje sporova pred entitetskim i registracionim savezima određuju entitetski i registracioni savezi, s tim da se visina naknada za registraciju igrača donosi u skladu sa odlukom Izvršnom odbora NS/FS BiH.

Član 137.

U smislu prethodnog člana, obavezno je plaćanje takse:

1. Na sve zahtjeve za rješavanje spornog odnosa,
2. Na žalbe podnesene na odluku prvostepenog organa,
3. Na apelacije,
4. Na zahtjev za zaštitu zakonitosti primjene Pravilnika.

Član 138.

Visina takse koju je utvrdio Izvršni odbor NS/FS BiH objavljuje se u službenom glasniku NS/FS BiH.

XX TROŠKOVI POSTUPKA

Član 139.

U postupku rješavanja sporova neće se priznavati stranama u postupku posebni troškovi izuzev troškova vještačenja i taksi na podneske u skladu sa čl. 137. ovog Pravilnika.

U sporovima koji se vode po zahtjevu profesionalnog igrača, pored drugih dokaza može se provesti i vještačenje putem sudskog vještaka finansijske struke. Troškove akontativno, kao avans, plaća strana koja podnosi zahtjev, s tim što će plaćanje troškova, po okončanju postupka, predstavljati obavezu strane koja nije uspjela u sporu.

Ako podnosilac zahtjeva akontativno ne uplati troškove vještačenja u ostavljenom roku, postupak će se obustaviti.

Član 140.

U rješavanju sporova pred organima saveza neće se priznavati troškovi advokata niti obračunavati kamate.

XXI PRELAZNE I ZAVRŠNE ODREDBE

Član 141.

Ovaj Pravilnik stupa na snagu i primjenjuje se od početka ljetnog registracijskog perioda 2018. godine. Stupanjem na snagu ovog Pravilnika prestaju da važe odredbe Pravilnika o registraciji statusu i transferu igrača NS/FS BiH, usvojenog na sjednici Izvršnog odbora NS/FS BiH, održanoj 21.06.2012. godine.

Sporovi koji su započeti, a nisu riješeni do stupanja na snagu ovog Pravilnika će se rješavati prema odredbama Pravilnika usvojenog 21.06.2012. godine.

Član 142.

Sporovi koji su nastali primjenom propisa i odluka nadležnih organa NS/FS BiH, koji su važili prije stupanja na snagu ovog Pravilnika, rješavaće se po odredbama prethodnog Pravilnika i odluka donijetih do stupanja na snagu ovog Pravilnika.

Član 143.

Ako je posljednji dan svih rokova utvrđenim ovim Pravilnikom nedjelja ili državni praznik, taj rok se produžava za prvi naredni radni dan.

Član 144.

Ugovori zaključeni prije stupanja na snagu ovog Pravilnika su važeći.

Član 145.

Ugovori zaključeni po stupanju na snagu ovog Pravilnika, a koji su suprotni ovom Pravilniku, ili su suprotni obaveznim propisima u pravnom sistemu BiH, odnosno entiteta, smatrat će se ništavim.

Član 146.

Disciplinske sankcije u smislu ovog Pravilnika su propisane Disciplinskim pravilnikom NS/FS BiH.

Član 147.

Sva sporna pitanja iz ovog Pravilnika će se rješavati po odredbama ovog Pravilnika, u skladu sa Statutom NS/FS BiH i Pravilnicima FIFA-e.

U slučaju neusklađenosti bilo koje odredbe ovog Pravilnika i FIFA Pravilnika o statusu i transferu igrača primjenjuju se odredbe FIFA Pravilnika o statusu i transferu.

Član 148.

Sve što nije regulisano ovim Pravilnikom, rješavat će odlukama Izvršnog odbora u skladu sa Statutom NS/FS BiH i u skladu sa odgovarajućim Pravilnikom FIFA-e.

Član 149.

Pri tumačenju ovog Pravilnika mora se polaziti od slijedećih principa:

1. Da se ugovori moraju poštovati;
2. Načelo da u slučaju opravdanog razloga svaka strana može raskidati ugovore bez posljedica;
3. Da profesionalci mogu raskidati ugovore iz sportski opravdanog razloga;
4. Da se ugovori ne mogu raskinuti za vrijeme trajanja sezone;
5. Da se u slučaju raskida ugovora bez opravdanog razloga, naknada plaća i da takva naknada može biti regulisana ugovorom;
6. Da će se u slučaju raskida ugovora bez opravdanog razloga izreći sportske kazne strani koja je raskinula ugovor;
4. Da kod jednostranog raskida ugovora štetne posljedice snosi strana koja je ugovor raskinula;
5. Da se igraču ne može raskinuti ugovor dok traje medicinska rehabilitacija;
6. Da se obavezna naknada plaća kod transfera profesionalnih igrača dok igrač ne navrši 23 godine života;
7. Poslije navršene 23 godine života obeštećenje se plaća ako se ugovor raskida u toku njegovog trajanja, bez obzira na godine života igrača;
8. Da opravdanost raskida ugovora cijene organi ovog saveza, odnosno entitetski savezi, ako se igrač i klub ne mogu dogovoriti;
9. Da se odredbe o mehanizmu solidarnosti primjenjuju u skladu sa propisima FIFA-e;
10. Da termin takmičarska sezona znači takmičarski period ljeto – zima;
11. Da odredbe ovog Pravilnika može mijenjati samo izvršni odbor NS/FS BiH.

Član 150.

Za autentično tumačenje ovog Pravilnika nadležan je Izvršni organ NS/FS BiH, uz prethodno mišljenje Pravnog komiteta NS/FS BiH.

PREDSJEDNIK

Elvedin Begić

Dodatak 1

PROCEDURA KOJA REGULIŠE ZAHTJEVE ZA PRVU REGISTRACIJU I MEĐUNARNODNI TRANSFER MALOLJETNIH IGRAČA

Principi

Član 1.

1. Procedura apliciranja za prvu registraciju maloljetnog igrača ili međunarodni transfer maloljetnog igrača u skladu sa članom biće vođena putem TMS-a.

Odgovornost asocijacija članica

Član 2.

1. Sve asocijacije članice su dužne redovno provjeravati tab „maloljetni igrači“ u TMSu, a najmanje svaka tri dana, te obratiti posebnu pažnju upitima ili zahtjevima za izjašnjenja.
2. Asocijacije članice će biti isključivo odgovorne za eventualne proceduralne nedostatke do kojih može doći zbog nepoštivanja gornjeg stava 1.

Sastav potkomiteta

Član 3.

1. Potkomitet kojeg je imenovao FIFAin Komitet za status i transfer igrača činiće predsjedavajući i zamjenik predsjedavajućeg Komiteta za status i transfer igrača sa još devet članova.
2. Potkomitet će u pravilu odluke donositi s najmanje tri člana. U hitnim slučajevima predsjedavajući ili neki član kojeg ovaj imenuje, može donositi odluke kao sudija pojedinac.

Ponašanje tokom postupka

Član 4.

1. Sve strane koje su uključene u postupak dužne su djelovati u dobroj vjeri.
2. Sve strane koje su uključene u postupak dužne su potkomitetu reći (govoriti) istinu.
3. Potkomitet može koristiti sva raspoloživa sredstva kako bi osigurao poštivanje ovih principa ponašanja. Eventualna kršenja, kao što su na primjer falsifikovani dokumenti, kažnjavaće Disciplinski komitet u skladu sa FIFAinim Disciplinskim pravilnikom.

Pokretanje postupka, podnošenje dokumenata

Član 5.

1. Zahtjev (aplikacija) za saglasnost za prvu registraciju predmetna asocijacija je dužna unijeti u TMS. Nikakvi drugačiji zahtjevi neće biti razmatrani. Aplikanti će od TMS-a dobiti potvrdu o primitku. Sva dokumenta koja su potrebna za aplikaciju moraju se dostaviti s prevodom na jedan od službenih jezika FIFA-e, u PDF formatu.
2. U zavisnosti od pojedinosti predmetnog slučaja, asocijacija koja podnese zahtjev (aplikaciju) takođe je obavezna da u TMS unese i specifične dokumente sa naredne liste:
 - Dokaz o identitetu i državljanstvu – igrač
 - Dokaz o identitetu i državljanstvu – igračevi roditelji
 - Dokaz o datumu rođenja (rodni list) – igrač
 - Ugovor o radu – igrač

- Ugovor o radu – igračevi roditelji
- Radna dozvola – igrač
- Radna dozvola – igračevi roditelji
- Dokaz o boravištu – igrač
- Dokaz o boravištu – igračevi roditelji
- Dokumentacija o školskoj spremi – obrazovanju
- Dokumentacija o nogometnom obrazovanju
- Dokumentacija o smještaju – zbrinjavanju
- Roditeljska saglasnost
- Dokaz o udaljenosti: pravilo 50 km
- Dokaz o saglasnosti druge asocijacije

3. Ukoliko ne bude dostavljen neki od obaveznih dokumenata, ili ako prevod ili službena potvrda ne budu dostavljeni u skladu sa donjim Članom 7, aplikant će o tome biti odgovarajuće obaviješten u okviru TMSa. Aplikacija će biti obrađena samo ako su podneseni svi obavezni dokumenti ili ako su svi potrebni prevodi i službene potvrde korektno dostavljene u skladu sa donjim Članom 7.

4. Aplikant može uz svoj zahtjev dostaviti i bilo koji drugi dokument koji smatra neophodnim. Potkomitet može od aplikanta u svako doba tražiti dodatne dokumente.

Izjašnjenje, nepodnošenje izjašnjenja

Član 6.

1. U slučaju zahtjeva za saglasnost za međunarodni transfer, prethodna asocijacija će dobiti pristup svim dokumentima koji nisu povjerljive prirode u TMSu i biti pozvana da putem TMSa dostavi svoje izjašnjenje u roku od sedam dana.

2. Prethodna asocijacija također može putem TMSa dostaviti bilo koji drugi dokument koji smatra neophodnim.

3. Ukoliko takvo izjašnjenje ne bude dostavljeno, potkomitet će odlučivati na temelju raspoložive dokumentacije.

Jezik na kojem su pisani dokumenti

Član 7.

Ukoliko neki od dokumenata nije na raspolaganju na jednom od četiri službena jezika FIFAe, asocijacija je dužna dostaviti bilo prevod tog dokumenta na neki od četiri službena jezika FIFAe, bilo službenu potvrdu predmetne asocijacije u kojoj su sumirane činjenice iz odgovarajućeg dokumenta na jednom od četiri službena jezika FIFAe. Ukoliko asocijacija ne postupi na navedeni način to može, u skladu sa gornjim Članom 5. stav 3. dovesti do toga da potkomitet ne uzme u obzir predmetni dokument.

Rokovi

Član 8.

1. Rokovi će biti određivani putem TMSa i biće pravosnažni.

2. Svi podnesci moraju biti uneseni u TMS do roka koji važi za vremensku zonu predmetne asocijacije.

Saopštavanje odluka, pravni lijek

Član 9.

1. Strane će biti obaviještene o odluci potkomiteta putem TMS-a što će se smatrati pravovaljanim obavještanjem. Takvo obavještanje će biti zakonski obavezujuće.

2. Strane će istovremeno biti informisane da imaju deset dana od obavještenja u kojem roku mogu tražiti, u pisanom obliku, temelj za donošenje predmetne odluke, te ukoliko propuste da to učine, odluka će stupiti na snagu. Ukoliko neka strana zatraži temelj na kojem je donosena odluka, odluka s obrazloženjem će biti saopštena stranama u punoj pisanoj formi. Rok za podnošenje žalbe počinje teći nakon dostavljanja (saopštavanja) obrazložene odluke.

Dodatak 2

SISTEM PRAĆENJA TRANSFERA (TMS)

Djelokrug

Član 1.

1. Sistem praćenja transfera kreiran je da osigura kako bi organi specifični za nogomet imali na raspolaganju više detalja o međunarodnim transferima igrača. To će povećati nivo transparentnosti pojedinačnih transakcija što će zauzvrat unaprijediti kredibilitet i položaj cijelog sistema transfera.
2. TMS je kreiran da napravi jasnu distinkciju između raznih plaćanja u vezi međunarodnih transfera igrača. Sve takve isplate moraju biti unesene u ovaj sistem jer je to jedini način da se postigne transparentnost u vezi praćenja novca koji je u optičaju vezano za te transfere. Istovremeno, ovaj sistem će također osigurati da se radi o stvarnom igraču koji je imao transfer a ne o nekom fiktivnom igraču koji se koristi za pranje novca.
3. TMS pomaže u zaštiti maloljetnih igrača. Ukoliko se maloljetni igrač prvi put registruje kao neko ko nije državaljanin te zemlje ili je predmet međunarodnog transfera, potrebna je saglasnost potkomiteta kojeg u tu svrhu imenuje Komitet za status i transfer igrača. Zahtjev za saglasnost asocijacije koja želi registrovati igrača i kasniji postupak odlučivanja vode se putem TMS-a.
4. TMS je aplikacija zasnovana na internetu putem koje se kreira (izdaje) elektronski Certifikat o međunarodnom transferu igrača (ITC). U okviru djelokruga ovog Dodatka relevantni postupak koji se odvija putem TMSa u potpunosti zamjenjuje izdavanje ITCa u papirnom formatu.
5. Korištenje TMSa je obavezan korak za sve međunarodne transfere profesionalnih muških igrača u okviru „velikog“ nogometa („eleven-a-side“), te svaka registracija takvog igrača bez korištenja TMSa smatrat će se nepravovaljanom. U narednim članovima ovog Dodatka termin „igrač“ će se isključivo odnositi na muške igrače koji igraju „veliki“ nogomet („eleven-a-side“).
6. Međunarodni transfer treba unijeti u TMS kadgod igrač stekne ili zadrži svoj profesionalni status (član 2, stav 2) nakon predmetnog događaja.

Sistem

Član 2.

1. TMS asocijacijama i klubovima obezbjeđuje sistem podataka zasnovan na internetu koji je kreiran za vođenje i praćenje međunarodnih transfera.
2. Zavisno od vrste transfera, potrebno je unijeti razne informacije.
3. U slučaju međunarodnog transfera gdje nije potpisan ugovor o transferu, involvirani klubovi su dužni, neovisno jedan od drugog, nakon što ugovor bude potpisan, u TMS dostaviti informacije i unijeti određene dokumente koji se odnose na transfere. Postupak se zatim prenosi na asocijacije za izdavanje elektronskog ITCa
4. U slučaju međunarodnog transfera gdje je potpisan ugovor o transferu, involvirani klubovi su dužni, neovisno jedan od drugog, nakon što ugovor bude potpisan, u TMS dostaviti informacije i unijeti određene dokumente koji se odnose na transfere. Informacije svakog kluba pojedinačno se ocjenjuju u pogledu toga da li se njihove najvažnije poante slažu sa podacima koje je dostavio drugi klub.

5. U slučaju iz prethodnog stava ovog člana, postupak se prenosi na asocijacije samo za izdavanje elektronskog ITCa nakon što se postigne dogovor na nivou klubova.

Korisnici

Član 3.

1. Svi korisnici su dužni djelovati u dobroj vjeri.
2. Svi korisnici su dužni svakodnevno u redovnim razmacima provjeravati TMS i naročitu pažnju posvećivati eventualnim upitima ili zahtjevima za izjašnjenje.
3. Korisnici su odgovorni za obezbjeđenje sve opreme koja je neophodna za ispunjavanje njihovih obaveza.

3.1. Klubovi

1. Klubovi su odgovorni za unošenje i verifikovanje uputstava o transferu u TMS i, gdje je to slučaj, dužni su se pobrinuti da se tražene informacije slažu. Ovo se odnosi i na unošenje traženih dokumenata.
2. Klubovi su odgovorni osigurati odgovarajuću obuku i nou-hau (know-how) kako bi mogli ispuniti svoje obaveze. U tom smislu, klubovi su dužni imenovati TMS menadžere koji su obučeni za rad na TMSu. TMS administratori i relevantna vruća linija mogu im pomagati u pogledu svih tehničkih pitanja, ukoliko bude potrebno.

3.2. Asocijacije

1. Asocijacije su odgovorne za vođenje podataka o svojoj sezoni i registraciji kao i podataka o svojim klubovima (uključujući naročito kategorizaciju klubova u vezi sa obeštećenjem za treniranje) i o zastupnicima. Pored toga, one su odgovorne za vođenje postupka izdavanja elektronskog ITCa i, gdje je to slučaj, za potvrđivanje ispisivanja njihovih igrača iz tih asocijacija.
2. Asocijacije su odgovorne osigurati odgovarajuću obuku i nou-hau (know-how) kako bi mogle ispuniti svoje obaveze. U tom smislu, asocijacije su dužne imenovati TMS menadžere koji su obučeni za rad na TMSu. TMS administratori i relevantna vruća linija mogu im pomagati u pogledu svih tehničkih pitanja, ukoliko bude potrebno.

3.3. Generalni sekretarijat FIFAE

Razna nadležna odjeljenja unutar Generalnog sekretarijata FIFAE odgovorna su za:

- a) unošenje relevantnih sportskih sankcija i rješavanja eventualnih prigovora na kršenja pravilnika;
- b) unošenje relevantnih disciplinskih sankcija;
- c) unošenje suspenzija asocijacija.

3.4. TMS administratori

TMS administratori su odgovorni za upravljanje pristupom korisnika.

Obaveze klubova

Član 4.

1. Klubovi su dužni za međunarodne transfere koristiti TMS.
2. Klubovi su obavezni da unose uputstva o transferima unoseći minimalno obavezne dokumente) i obezbjeđujući naredne obavezne podatke zavisno od izabrane vrste uputstva:
 - Vrsta uputstva (Angažman; Puštanje; Razmjena; Vanugovorni Angažman)
 - Naznaka da li se za transfer plaća obeštećenje
 - Naznaka da li je igrač transferisan na bazi ustupanja, te kasnije da li se igrač vraća s ustupanja, odlazi za stalno ili se produžuje period ustupanja
 - Novi klub
 - Nova asocijacija
 - Krajnji rok za plaćanje
 - Valuta u kojoj se vrši plaćanje
 - Naznaka da li se obeštećenje za treniranje plaća u cijelom iznosu ili u ratama
 - Posrednik kluba(ova)/ako je to slučaj/ plus njegova provizija
 - Posrednik igrača (ako je to slučaj)
 - Ime, državljanstvo i datum rođenja igrača
 - Datum početka i završetka zadnjeg igračevog ugovora
 - Razlog za raskid zadnjeg igračevog ugovora
 - Datum početka i završetka novog igračevog ugovora
 - Podaci o dogovorenom sveukupnom i uslovnom obeštećenju za transfer
 - Sveukupna obeštećenja za treniranje
 - Plan izmirenja obeštećenja za treniranje, uključujući vrstu plaćanja, izvorni ili klub koji je destinacija, datum plaćanja, iznos i podaci o uslovima obeštećenja za transfer
 - Izjavu o plaćanju treće strane
 - Podaci o banci (Naziv banke ili Code banke; Broj računa ili IBAN; Adresa banke; Korisnik)
3. Klubovi su takođe obavezni obezbijediti verifikaciju unesenog uputstva o transferu.
4. Isto tako, od klubova se zahtijeva da riješe izuzetke uz učešće drugog predmetnog kluba, ako je to slučaj.
5. Procedura oko zahtjeva za ITC može početi tek nakon što klubovi ispune sve svoje obaveze u skladu sa prethodnim stavovima ovog člana.
6. Prilikom objave izvršenja plaćanja, klub koji vrši plaćanje dužan je u TMS unijeti dokaz o izvršenom prenosu sredstava.

Obaveze asocijacija

Član 5.

U pogledu Međunarodnih transfera igrača Asocijacija su dužne koristiti TMS.

5.1. Master podaci

1. Datumi početka i završetka oba registracijska (prelazna) perioda kao i sezone, moraju biti obezbijeđeni najmanje 12 (dvanaest) mjeseci prije njihovog stupanja na snagu. U izuzetnim okolnostima asocijacija mogu izmijeniti ili dopuniti datume svojih registracijskih perioda (prelaznih rokova) sve do početka njihovog trajanja. Nakon što počne teći registracijski period, neće biti dozvoljene nikakve izmjene datuma. Registracijski periodi uvijek moraju biti u skladu sa uslovima iz člana 6. stav 2. FIFA Pravilnika o statusu i transferu igrača.

2. Podaci o adresi kluba, telefonu, e-mailu i kategoriji treniranja moraju biti redovno ažurirani.
3. Podaci o licenci posrednika igrača i osiguranju moraju biti redovno ažurirani.

5.2. Podaci o transferu

1. Prilikom unošenja uputstava o transferu, klubovi su dužni navesti koji je igrač involviran u transfer. TMS sadrži pojedinosti o mnogim igračima koji su učestvovali u FIFA-inim turnirima. Ukoliko se podaci o predmetnom igraču već ne nalaze u TMSu, klubovi su ih dužni unijeti kao dio uputstva o transferu. Postupak oko zahtjeva za ITC može početi tek nakon što podatke o predmetnom igraču verificuje i potvrdi prethodna igračeva asocijacija. Prethodna asocijacija je dužna odbiti igrača ukoliko podaci o njegovom identitetu ne mogu biti u potpunosti potvrđeni.
2. Postupak oko zahtjeva za ITC će u odgovorajuće vrijeme provesti nova asocijacija.
3. Postupak oko odgovora na zahtjev za ITC će u odgovorajuće vrijeme provesti prethodna asocijacija.
4. U slučaju dobijanja ITCa, od nove asocijacije se zahtijeva da unese i potvrdi datum registracije igrača.
5. U slučaju odbijanja zahtjeva za izdavanje ITCa od nove asocijacije se zahtijeva da ili prihvati ili ospori to odbijanje, zavisno od slučaja. U slučaju privremene (privremene) registracije ili u slučaju saglasnosti sudije pojedinca za privremenu registraciju nakon što je nova asocijacija osporila odbijanje, od nove asocijacije se zahtijeva da unese i potvrdi podatke o registraciji.

5.3 Obuka u klubu

Kako bi se osiguralo da će klubovi biti u stanju ispuniti svoje obaveze u vezi s ovim Dodatkom, relevantna asocijacija je odgovorna za permanentnu obuku.

Dodatak 3

MEHANIZAM SOLIDARNOSTI

Solidarni doprinos

Član 1.

1. Ako Profesionalni igrač prelazi u drugi klub tokom trajanja ugovora, 5% od svakog obeštećenja, izuzimajući naknadu za treniranje koja se plaća Prethodnom klubu, Novi klub će odbiti od ukupnog iznosa to obeštećenje i rasporediti kao solidarni doprinos na klub(ove) koji je bio(li) uključen(i) u treniranje i obrazovanje igrača tokom godina.

2. Solidarni doprinos će odražavati broj godina (obračunat pro rata ako je to manje od jedne godine) koje je igrač bio registrovan u relevantnom klubu(ovima) između sezona kad je navršio 12 (dvanaest) i 23 (dvadeset tri) godine, kako slijedi:

- Sezona kad je navršio 12 godina: 5% (tj. 0,25% ukupnog obeštećenja)
- Sezona kad je navršio 13 godina: 5% (tj. 0,25% ukupnog obeštećenja)
- Sezona kad je navršio 14 godina: 5% (tj. 0,25% ukupnog obeštećenja)
- Sezona kad je navršio 15 godina: 5% (tj. 0,25% ukupnog obeštećenja)
- Sezona kad je navršio 16 godina: 10% (tj. 0,5% ukupnog obeštećenja)
- Sezona kad je navršio 17 godina: 10% (tj. 0,5% ukupnog obeštećenja)
- Sezona kad je navršio 18 godina: 10% (tj. 0,5% ukupnog obeštećenja)
- Sezona kad je navršio 19 godina: 10% (tj. 0,5% ukupnog obeštećenja)
- Sezona kad je navršio 20 godina: 10% (tj. 0,5% ukupnog obeštećenja)
- Sezona kad je navršio 21 godina: 10% (tj. 0,5% ukupnog obeštećenja)
- Sezona kad je navršio 22 godina: 10% (tj. 0,5% ukupnog obeštećenja)
- Sezona kad je navršio 23 godina: 10% (tj. 0,5% ukupnog obeštećenja)

Postupak plaćanja

Član 2.

1. Novi klub je dužan platiti solidarni doprinos klubu(ovima) koji je(su) trenirao(li) igrača u skladu sa gornjim odredbama najkasnije 30 (trideset) dana nakon registracije igrača ili, u slučaju kontingentnog plaćanja (u ratama), 30 (trideset) dana nakon datuma svakog takvog plaćanja.

2. Dužnost je novog kluba da obračuna iznos solidarnog doprinosa i da ga rasporedi u skladu sa istorijatom igračeve karijere iz igračevog pasoša. Igrač je po potrebi dužan pomoći Novom klubu u izvršenju ove obaveze.

3. Ukoliko se u roku od 24 (dvadeset četiri) mjeseca od transfera igrača ne može utvrditi spona tog Profesionalca sa nekim od klubova koji su ga trenirali, solidarni doprinos treba platiti Asocijaciji(ama) države(a) gdje je Profesionalni igrač trenirao. Ovaj solidarni doprinos će biti usmjeren u programe razvoja omladinskog nogometa/fudbala u predmetnoj Asocijaciji(ama).

4. Disciplinska komisija može izreći disciplinske mjere klubovima koji ne poštuju svoje obaveze propisane ovim Dodatkom.